

Korinita

Lenji Leta Iviva

Pol Le Rorori

Utu iviva

Pol le vaghiliya theghewoniye e tine va i wa e ghemba idae Korinita, Akaiya ele valivanga Grik e tine. Le kaiwo Korinita e tine utuniye ina Vakatha 18:1-16. Korinita iye ghemba laghiye na lenji biznes lemoyo. Tembe ngoreiyeva Loi kwanikwan lenji ghamba kururu lemoyo e ghembako iyako e tine na utuniye i laghiye yathima thanavuniye kaiwae.

Pol le vaghiliya theghetoniye e tine i wa Epesas na ve kaiwowe theghathegha umboto. Mbananiye ina Epesas e tine, gharighari vavana thi menawe thi ri ekelesiya Korinita e tine na thi giya Pol yanawae vuyowo na mevathari vavana thi yomara ekelesiya e tine. Vuyowoko iyava thi utunangiko vavana ngoranjiyake: thi vakatha wabwi ekelesiya e tine (1:10-4:21), yathima thanavuniye i yomara ekelesiyako e tine (5:1-13), thi vakatha Giya le ghaninga ma i mborom-boro (11:17-34), na vavana thinava ramaremare ma tene thi thuweiruva (15:12-33). Na tembe ngoreiyeva leta yangara i mena Korinita e tine na e letako iyako thi vaito Pol bigibigi vavana kaiwanji (7:1; 8:1; 12:1 na 16:1). Iya kaiwae Pol i roriya lenji leta na i vavurighhehengi bigibigiko thiyako kaiwanji na i thombeya lenji vaitongiko. Na tembe i giyava yanawanji ne i wa wenji na

ve thuwengi (16:5-7).

¹ Ghino Pol, Loi le renuwanja va i kula e ghino na ya tabo Krajs Jisas ghalinae gharaghambi. Weingu ghaghanda Sostins wo roriya letake iyake ² na wo variye i ghaona e ghemi, ghemi Loi le ekelesiya Korinita wenga. Ghemi Loi kaerova i ghatha rangiyanga amalaghiniye kaiwae, kaiwae kaero i tubwenga weya Krajs Jisas na iye le wabwi, na i tuthinga ghemi hu tabona amalaghiniye le gharighari. Ko ma mbe ghemi enge, weimiyangiya valivangake wolaghiye gharighariniye, thavala thi kururu weya ghanda Giya Jisas Krajs, iye thiye na ghinda ghanda Giya. ³ Wo nango weya Ramanda Loi na ghanda Giya Jisas Krajs gharenji wenga na lenji gharemali i riyevanjara gharemina.

⁴ Mbanake wolaghiye ya vata ago weya Loi, kaiwae le mwaewoko iyako kaero i tubwenga weya Krajs Jisas. ⁵ Iyake kaiwae Loi kaero i giya bigibigike thovuthovuye wolaghiye e ghemi, valikaiwami lemi utuutu i thovuye na lemi ghareghare i laghiye. ⁶ Lama vavaghare e ghemi Krajs kaiwae kaero e ghawokithinja na i laweghathinga, ⁷ iya kaiwae Nyao Boboma le giya bwagabwaga ma regha i ghenethavwi e ghemi. Mbanake mbema hu roroghaha enge ghanda Giya Jisas Krajs le njoghama kaiwae. ⁸ Iye ne i njimbukikinga na mbe hu vurigheghe vara ghaghada mbanja le ghambako, na mbanja mbala Giya Jisas Krajs le njoghama ma e ghamiwonjowe mun. ⁹ Emunjoru, valikaiwara vareminka Loi, iye i kula vathanga na weimi

Nariye, Jisas Kraiss ghandha Giya, hu yaku na ghamwami vanaora.

¹⁰ Lo bodaboda, ghandha Giya Jisas Kraiss e idae ya utu vavurigheghe e ghemi, weimiyangiya ghamunena lemi renuwana regha, mbala ma hu vakatha wabwi e tinemina, ko lemi renuwana hu vamboromboro e gharemina na hu wabwi na regha. ¹¹ Lo bodaboda, gharighari vavana thi mena Kloe ele ngoloko tine, thi giya yanawang'u, thiya, mbe ghemi enge hu vegaiithi wananga. ¹² Vavana ghemi hunja, "Ghime wo ghambugha Pol"; na vavana hunja, "Ghime wo ghambugha Apolos"; na vavana hunja, "Ghime wo ghambugha Pita"; na vavana tembe hunjava, "Ghime wo ghambugha Kraiss."

¹³ Lemi vakatha ngoreiyako, ngoreiya hu govuyaviya Kraiss. Ngoronga, Pol va i mare kaiwami? Va hu bapitaiso Pol e idae? ¹⁴ Ya vata ago weya Loi kaiwae mava ya bapitaisonga mun, mbe Krisipas na Gaiyus enge; ¹⁵ iya kaiwae ma valikaiwae lolo regha e tinemina ne inja, "Ghino va ya bapitaiso Pol e idae." ¹⁶ Aa, ngoreiye te vambe ya bapitaisongiva Setepano le wabwi, ko ma te elo ghareghare reghava na va ya bapitaiso lolo reghava. ¹⁷ Kaiwae Kraiss mava i variyengo na ya bapitaisongiya gharighari, ko iyemaenge va i variyengo na ya vavagharena Toto Thovuye. Ma yana ya vavaghare ghino lo thimba e tine, nandere, iyemaenge nuwanguiya gharighari thi ghamino Jisas ghakros utuniye le vurigheghe na thava kros utuniye le vurigheghe i tabo na bigi bwagabwaga.

*Krais iye thimba na vurigheghe i mena weya
Loi*

¹⁸ Kaiwae Krais le mare e kros vwatae utuniye wenjiya thavala e gharenji ma thi ghareghare Loi, ngoreiya bigi bwagabwaga wenji, ko iye-maenge ghinda kaero ra vaidiya vamoru, Jisas le mare e kros vwatae utuniye weinda ra ghaminogha Loi le vurigheghe. ¹⁹ Ngoreiya Buk Boboma le woranjiya, Loi ija, “Ne ya rakayathu raghareghare lenji thimba, thavala nuwanji i goi ne ya kitena lenji renuwanja.”

²⁰ Ngoronga thiye rathimbathimba? Ngoronga thiye nuwanji i goi? Ngoronga thiye thi thimba e utuutu e yambaneke? Loi kaerova i viva gharighari lenji thimba i tabo na bigi bwagabwaga.

²¹ Gharighari ghinda la thimba e tine ma valikaiwanda na ne ra ghareghareya Loi, kaiwae Loi weiye le thimba va i renuwanja ngoreiyako. Ko iyemaenge Totoko iyava wo utunako na gharighari thijava utu bwagabwaga, Loi i vakaiwoja na i vamorunjiya thavala thi lonweghathi. ²² Jiu nuwanjiya thi thuweya vakatha ghamba rotaele e maranji, na Grik nuwanjiya thi lonweya gothimbathimba, ²³ ko ghime wo vavaghareja Krais le mare e kros vwatae. Totoko iyako Jiu gharighariniye lenji ghamba thalativa, na thiye ma Jiu wenji ngoreiya kabaleya lenji utuutu. ²⁴ Ko thavala kaerova Loi i kula wenji, Jiu na thiye ma Jiu gharighariniye, Krais iye Loi le vurigheghe

na le thimba. ²⁵ Gharighari vavana lenji renuwaṅa thiṅava Loi le vakathako iye bigi bwagabwaga, ko iyemaenṅe amalaghiniye le vakathako i kivwalanṅiya gharighari lenji thimbako ghavakavakatha. Tembe ṅgoreiyeva, vavana lenji renuwaṅa thiṅava Loi le vakatha ma ele vurigheghe, ko iyemaenṅe le vakathako iyako i vurigheghe kivwala gharighari lenji vakatha.

²⁶ Lo bodaboda, wo hu renuwaṅa mbaṅa Loi va i kula wenṅa na kaero hu tabo ralonṅwelonṅweghathi. Ghemi va e lemi ghareghare gharighari e maranji, ma hu ghanagha, ghemi va ravurivurigheghe, ma hu ghanagha, na ghemi e idaidami laghiye, ma hu ghanagha. ²⁷ Ko iyemaenṅe ra numovuvura, gharighari e yambaneke e maranji, thiye Loi va i tuthinṅi, na iyake kaiwae i vakathanṅiya raghareghare thi monjina. Na thavala thi njavovo gharighari e yambaneke e maranji, thiye Loi va i tuthinṅi, na iyake kaiwae i vakathanṅiya thiye e lenji vurigheghe, thi monjina. ²⁸ Na Loi va i tuthinṅiya gharighari ma e idaidanji, na gharighari thiye gharighari wolaghiye thi botewo, na gharighari thiye gharighari wolaghiye lenji renuwaṅa thiye ma bigi moli ṅgoreiye. Va i vakatha ṅgoreiyako mbala iya bigibigiko gharighari lenji renuwaṅa iṅava e ghanjithovuye laghiye, ne thi tabo na bigi bwagabwaga. ²⁹ Loi va i vakatha ṅgoreiye, na mbala ma valikaiwae lolo regha tembe i tarawenṅava ghamberegha Loi e marae. ³⁰ Amalaghiniye kaiwae hu yaku weya Krais Jisas, iye kaero i tabo

na Loi le thimba kaiwanda. Ngoreiyake, Kraisi wovarumwarumwaruṅainda, i vabobomaṅainda, na i rakayathuinda thari e tine. ³¹ Ngoreiya Buk Boboma le utu: “Thela nuwaiya i wovorovoroṅa, valikaiwae i wovorovoroṅa Giya Loi.”

2

Pol i vavaghareṅa Kraisi le mare

¹ Lo bodaboda, mbaṅa va ya ghaona na ya vavaghareṅa Loi utuniye e ghemi, lo utuutu mava ṅgoreiya rautuutu laghiye na rathimbathimba lenji utuutu. ² Lo yakuyaku e ghemi, mava lo renuwanṅava regha, ko mbema Jisas enge na le mare e kros vwatae utuutuniye. ³ Mbaṅa vambe inṅgu e ghemi, ya njavovo weinṅu lo mararu na riwanṅu i tage. ⁴ Mbaṅa ya utuṅa na ya vavaghareṅa Toto Thovuye e ghemi, lo vavaghare ma ṅgoreiya rathimbathimba lenji utuutu na ya utuwo nuwami, ko lo vavaghareko Loi i vaemunjoroṅa Nyao Boboma le vurigheghe e tine, ⁵ mbala lemi loṅweghathina thava i ndeghathi gharighari lenji thimba e tine, ko i ndeghathi enge Loi le vurigheghe e tine.

Loi le thimba i mena weya Nyao Boboma

⁶ Emunjoru ma ya utu ṅgoreiya rathimbathimba lenji utuutu, ko iyemaenge thimba regha iya ya utuṅa wenṅiya thavala kaero thi gharematuwa. Iya thimbake iyake ma i mena e yambaneke, na yambaneke gharambarombaro ma thi ghareghare, thiye lenji vurigheghe

tene iko. ⁷ Ko thimbake iya ya utujake, i mena weya Loi, na vambowo i wothuwele. Amba muyai i vakatha yambaneke, thimbake iyake vama inawe. E tine ghinda ra vaidiya bigibigike thovuthovuye wolaghiye va i vivatharawe ghinda kaiwanda. Mbanja va i vivako Loi mava i woranjiya thimbake iyake wenjiya gharighari. ⁸ Yambaneke gharambarombaro mava thi ghareghareya thimbake iyake. Kaiwae thongova e lenji ghareghare, mbala mava thi rokros vwenyevwenye gha Giya. ⁹ Ko iye-maenge, Buk Boboma i woranjiya ngoreiyake, inja,

“Budakaiya ma mbanja regha gharighari thi thuwe o thi lonweya, na ma mbanja regha thi renuwana kaiwae, bigibiginiye Loi kaerova i vivatharawe thavala thi gharethovuwe kaiwanji.”

¹⁰ Ko Nyao Boboma le kaiwo e tine, Loi i woranjiya weinda bigibiginiyeko iyava i rothuweleko moli.

Nyao Boboma i ghareghareya bigibigike wolaghiye, othembe Loi le renuwana iya i dumwagako moli i ghareghare. ¹¹ Ma lolo regha i ghareghare lolo reghava le renuwana, mbe ghambereghako vara une i ghareghare. Tembe ngoreiyeva, ma lolo regha i ghareghareya Loi le renuwana, Loi ghamberegha Une i ghareghare. ¹² Ghinda ma ra wo yambaneke ririwoniye une, ko Nyaoko iya i mena weya Loi kaero ra wo na ina weinda. Iyake kaiwae, la renuwana ma mboromboro weiyambaneke

gharighariniye lenji renuwaṅa. Iya kaiwae valikaiwanda ra ghareghareya Loi le mwaewo bwagabwagake iya i giyake weinda. ¹³ Iya kaiwae wo vavaghareṅa Loi le mwaewo na ma lama utuutu ma wo weya lenji thimba e tine, ko iyemaenḡe i mena Nyao Boboma le vavaghare e tine. Na wo vamanjamanjalana Loi Une le renuwaṅa wenḡiya thavala Nyao Boboma ina wenḡi. ¹⁴ Ko thavala Nyao Boboma ma ina wenḡi, thiye ma nuwanjiya thi wovatha thebigiya i mena Loi e Une, kaiwae thi renuwaṅa thiye bigi bwagabwaga. Ma valikaiwanji thi wo ghanjirumwaru kaiwae mbe Nyao Boboma enḡe valikaiwae i woranḡiya ghanjirumwaru. ¹⁵ Ghinda iya Nyao Boboma inake weinda valikaiwanda ra wo bigibigike wolaghiye ghanjirumwaru. Ko thavala ma Nyao Boboma ina wenḡi, ma regha valikaiwae i ghareghareinda na ne i tuthi la ghareghare i rumwaru o nandere. ¹⁶ Ngoreiya Buk le utu, inḡa,

“Thela i ghareghareya Giya le renuwaṅa na valikaiwae i vavagharewe?”

Ko ghinda iya ra wo Nyao Boboma, la renuwaṅa ngoreiye Giya Krai le renuwaṅa.

3

¹ Lo bodaboda, mbaṅa va ya yaku weḡnguyanḡiya ghemi, ma valikaiwanḡu ya utu e ghemi ngoreiya ya utu wenḡiya gharighari thiye Nyao Boboma ina wenḡi. Ko lo utuutu e ghemi ngoreiya gharighari thiye yambaneke

gharerenuwana ina wenji, ngoreiya ghemi amba gamagai nanasiye Kraisi ghaghareghare kaiwae. ² Vambe ya ligiya enge thu e ghemi. Mava ya giya ghaninga vurigheghe e ghemi, kaiwae ma valikaiwami. Na othembe mbanake, ma valikaiwami ya giya ghaninga vurigheghe e ghemi na hu ghan, ³ kaiwae ghemi amba hu ghambugha yambaneke thanavuniye na gharighari yambaneke ghanjithanavu, kaiwae yamwakabu na ghatemuru mbe ina e ghemi. Thare thiyake thi vaemunjoruna yambaneke gharerenuwana ina e gharemina na iye i mbaronanga? ⁴ Kaiwae ghemi vavana hunja, "Ghime Pol le wabwi," na vavana hunja, "Ghime Apolos le wabwi." Iyake ngoreiya hu ghambugha yambaneke gharighariniye ghanjithanavu iyako, ae?

⁵ Ngoronga? Thela Apolos na thela Pol? Ghime mbema rakakaiwo enge. Tomethi ghamakaiwo Giya va i giya weime, na e lama kaiwoke iyake tine ghemi e lemi lonweghathi. ⁶ Ghino ya kabughathigha weiwo, Apolos i vavanjighinjighi e mbwa, ko Loi iye i vakatha na i mbuthu. ⁷ Thela i kabu na thela i vavanjighinjighi, thiye ma bigi ngoreiye, ko iye-maenge Loi iye i laghiye, kaiwae iye i vakatha na i mbuthu. ⁸ Rakabukabu na ravavanjighinjighi, theghewoko thi yaku e kaiwo regha, ko tembene regha na regha ve vaidiya le kaiwoko modae ngoreiya le vakathako. ⁹ Ghime thamaghewoke wo kaiwo na regha Loi kaiwae, na ghemi Loi le uma.

Na tembe ngoreiyeva, ghemi Loi le ngolo.

¹⁰ Ghino ngorangwa ngolo gharavatavatad iye ele ghareghare. Loi i giya wo mwaewo na ya vanamwe ngoloko ghayayao na ya woraweya ghambaghimbaghi, na ne gheko woune vavana thi vatavatadiwe. Ko iyemaenge regha na regha tembene i njimbukikiya le vatavatadiko. ¹¹ Loi kaerova i woraweya ngoloko ghambaghimbaghi iye Jisas Krai, na thava te lolo reghava i woraweya mbaghimbaghi togha. ¹² Gharighari vavana ne thi vatavatad e mbaghimbaghike iyake, ne thi bigiya gol, silva na vari ghayamoyamo thovuye, ko iyemaenge vavana thi bigiya umbwaumbwa, winjiwinji na nana. ¹³ Ko iye-maenge regha na regha le kaiwo ghatovuye na ghathari ne ve yomara na ra thuwe mbanja Krai ne ghambanja i njoghama ghatha kaiwae. Kaiwae e mbanjako iyako ne ngoreiya ndighema, na ndigheko iyako ne i mandowa lolo regha na regha le kaiwo, i thovuye o i thari. ¹⁴ Thongo lolo regha le vatavatad mane i nda, na ne i wo le kaiwoko modae. ¹⁵ Ko thongo lolo regha le vatavatad i nda e ndighe kaero i thivaiya le kaiwoko une. Iye ne i vamoru ghamberegha yawaliye ngoreiya lolo i vorangima e ndighe une na nimae ma e uneune.

¹⁶ Kaero hu ghareghare ghemi Loi le Ngolo Boboma, na Nyao Boboma i yaku e ghemi. ¹⁷ Iya kaiwae thongo lolo regha i vakowana Loi le ngolo boboma, Loi tembene i vakowanava loloko iyako, kaiwae Loi le ngolo i boboma na ngolo bobomako iyako iya ghemina.

¹⁸ Thava ghemi regha i mando na tembe i yarova ghamberegha. Thongo lolo regha e

tinemina i renuwaŋa na iŋava iye yambaneke thimbaniye inawe, thimbako iyako mbala i botewo na gharighari thi wovakabakabaleyana, ambane iye i tabo na rathimbathimba moli. ¹⁹ Kaiwae budakaiya yambaneke gharighariniye thi renuwaŋa iye thimba, Loi e marae iye thimba bwagabwaga; ngoreiya Buk Boboma le woranġiya, iŋa, “Loi i vakathangiya rathimbathimba na tembe thiye ghanjimberegha thi wona e lenji thimbako tine,” ²⁰ na tembe iŋava, “Loi i ghareghare rathimbathimba lenji renuwaŋa ma e uneune.” ²¹ Iya kaiwae lolo regha na regha tha i utu weiye le sirari lemi randeviva kaiwanji. Kaiwae bigibigike wolaghiye ghemi kaiwami. ²² Randeviva ngoreiya Pol, o Apolos, o Pita, bigibigi ngoreiye yambaneke, yawali na mare, renuwaŋa ngoreiya noroke na mbaŋa i menamenako; thiyake ghemi kaiwami, ²³ na ghemi Krai kaiwae, na Krai Loi kaiwae.

4

Giya ghamberegha valikaiwae i tuthiya rakakaiwo le kaiwo ghathovuye na ghathari

¹ Lemi rerenuwaŋa ghime kaiwame mbala ngoreiya ghime Krai le rakakaiwo, iyava i bigirawenġi na bigiko iya simosimoko righe gharautu. ² Bigi laghiye moli rakakaiwo ngoranjyako wenġi, thiye thi mando na thi vamboromborona ghanjigiyako le renuwaŋa. ³ Ko thonġo ghemi o rambarombaro regha hu tuthiya lo kaiwoke ghathovuye na ghathari,

mane ya rerenuwana kaiwae. Othembe ghino wombereghake ma valikaiwanu ya wovathovuthovuyena o ya wovatharitharina lo kaiwo. ⁴ Ma te ya renuwana bigi regha va ya vakatha vathari, ko iyemaenge ma valikaiwae iyake kaiwae na ranava rakakaiwo thovuye ghino. Giya ghamberegha tembe i tuthi lo kaiwo i thovuye o i thari. ⁵ Iya kaiwae tha hu wovathovuthovuyena o hu wovatharitharina ghamune lenji kaiwo, kaiwae amba ma kot ghamana. Giya wo i mena, amba iye tembe ghamberegha i woranjiya e manjamanjala bigibigiko wolaghiye iya simosimoko righe weiye gharighari lenji renuwana thuwele e gharenji. Ko amba ghinda regha na regha ghandatarawa i mena weya Loi ngoreiya la kaiwoko.

⁶ Lo bodaboda, wo ya utuna ghino na Apolos. Nuwanjiya ghamba thuwathuwa ghime na hu ghareghare le utuutu gharumwaru, ngoreiya ghalinanda regha ina, "Thava hu vakatha o hunya iya mava thi rorori Buk Boboma e tine." Mbala ma hu sirari na hu wovorena lemi randeviva regha na hu wonjonanona randeviva reghava. ⁷ Thela i wovorevorenja idan na i kivwanjiya gharigharike wolaghiye? The bigi ina e ghen ma u wo weya Loi? Thongo len thovuye i mena weya Loi ghamberegha, buda kaiwae u wovorenanje ghanimberegha ngoreiye len thovuye i mena e ghen?

⁸ Ko ana bigibigike wolaghiye kaero i mborom-boro wenja? Ko ana thovuyeke wolaghiye kaero i riyevanjananga? Ko ana kaero hu tabo na rambarombaro laghilaghiye? Ko iyemaenge

ma emunjoru. Na ghime tembe ngoreiyeva mbala wo tabona rambarombaro laghilaghiye na wo mbaro weimanjiya ghemi? ⁹ Ko iyemaenge ma ngoreiyako. Ghayamoyamo e ghino ngoreiya ghime ghalinae gharaghambi, Loi va i bigiraweime muyai moli. Ghime ngoramengiya gharighari thiye mbaro inana thi mare gharighari e maranji. Ghime wo tabo na bigi regha gharighariki thi ghewoime, na tembe ngoreiyeva nyao thovuthovuye na yambaneke gharighariniye. ¹⁰ Krai kaiwae gharighari thi wova kabakabaleyanaima, ko iyemaenge weya Krai, ghemi lemi renuwaŋa huŋava hu thimba moli! Ghime wo njavovo, ko iyemaenge ghemi lemi renuwaŋa huŋava hu vurigheghe! Ghime ma ghamayavwatata i laghiye, ko iyemaenge ghemi lemi renuwaŋa huŋava ghamiyavwatata i laghiye! ¹¹ Va i menakowe na ghaghada noroke, bada i ghariime, mbwa i ghariime, lama njimbonjimbo i thari, thi tagavotagamena weime, wo rakaraka lolonga, ¹² na tembe ghime e nimanimame wo kaiwo vurigheghe. Mbaŋa gharighari thi utuvathari weime, wo vare-moliyanji, na mbaŋa thi giya vuyowo weime, wo ghatanaghathi. ¹³ Mbaŋa gharighari thi utukwan ghime kaiwame, ghime wo gonjogha wengi e utu thovuye. Ghime ngorameya ghembako ghadidiye, thi njongoyathuime, na ngorameya bigi bwagabwaga rameyambaneke e maranji. Mbe ngorame varako ghaghad noroke. ¹⁴ Ya rorori e ghemi na ya utu ngoreiyako, ma nuwanjiya lemi renuwaŋa huŋava ya vakathanja na hu monjina, ko iyemaenge

nuwanGUIya ya vavurigheghenanga ngoreiya ghemi lo nganga moli na valigharegharengu. ¹⁵ Valikaiwae ya vakatha ngoreiyako kaiwae ghino mbe womberegha enge ramami. Othembe Kraisi e idae ghamiranjimbunjimbu thi ghanagha moli, ghino Kraisi e idae ya tabo na ramami, kaiwae ghino iyava ya womena Totona Thovuye e ghemi. ¹⁶ Iya kaiwae ya nango vurigheghe e ghemi na hu ghambugha wothanavuke. ¹⁷ Iyake kaiwae, na ya variya Timoti i ghaona e ghemi. Iye ngoreiya narungu moli valigharegharengu, na iye Giya le rakakaiwo thovuye. Iye ne i vavuvuringa wothanavu Kraisi e yawaliye, na thanavungiko thiyako ya vavagharena wenjiya ekelesiya e valivanjake wolaghiye.

¹⁸ Vavana ghemi lemi renuwana hu munjeva mane ya ghaona ya thuwenga, iya kaiwae weimi lemi sirari. ¹⁹ Thongo Giya le renuwana ngoreiye, mbanja nasiye ya ghaona, na ya thuwengi thavala weinji lenji sirari na ne ya lonweya lenji utuutu na lenji renuwana, ko tembe ya thuweva lenji vurigheghe i emunjoru o nandere. ²⁰ Kaiwae Loi le ghamba mbaro mane ra thuwe gharighari e lenji utuutu, ko ne ra thuwe Loi le vurigheghe e tine. ²¹ Nuwamiya budakai? Ya wo ghaona umbwa ghe yabiyabibi e ghemi, o valikaiwae ya ghaona weingu lo gharethovu na lo gharenja?

5

Yathima thanavuniye ekelesiya e tine

¹ Ya lonjweya utuutu i mena e valivangana iyana, thijava yathima thanavuniye regha i yoyomara e ghemi. Yathimake thanavuniye iyake, othembe thiye ma thi ghareghareya Loi ma ghanjithanavu ngoreiye. Thijava ghimoru i ghena weiye ramae levo. ² Ngoronga na weiye lemi sirari? Valikaiwami hu monjina na hu nuwathari laghiye moli, na hu variyeyathu loloko iya i vakatha thanavuko iyako e lemi wabwina tine.

³ Othembe inanju bwagabwaga e ghemi, e gharenguke ghino mbe inanju vara ghena weinguyangiya ghemi. Na thongo rana ghino ngoreiya weinguyangiya ghemi, na ghandi Giya Jisas e idae kaero ya vakathavao loloko iyako ghambaro. ⁴ Hu vakatha ghambaro ngoreiyake: mbanja regha hu mevathavatha, na e gharenguke ghino mbe inanju vara ghena weinguyangiya ghemi, na ghandi Giya Jisas le vurigheghe mbe inava weinda, ⁵ amba rana na loloko iyako i rangi e lemi wabwina tine, hu viyathu na i wa Seitan ele mbaro tine. Mbala ve vakowana riwae, na mbwatane i uturangiya na i roiteta ghathanavu raraithari na mbala mbanja ghandi Giya le njoghama, une i vaidiya vamoru.

⁶ Ghemi weimi lemi sirari, ko iyemaenge ma i thovuya iyako! Kaero hu ghareghare, thongo isit seiwo ra worawe e pwalawa ne i ruwo pwalawako tine laghiye na i vakatha na i roro. Iyake ngoreiya lolo regha le thari thanavuniye valikaiwae i valawe e ghemi, na i vakowana lemi wabwina. ⁷ Hu wokiyathu thari thanavuniye, iya ngoreiya isit e ghemi, na

ghemi ngoramiya gharighari totogha. Emunjoru ghemi kaero gharighari totogha ghemi, kaiwae Kraisi kaerova i mare kaiwanda. Iye va ngoreiya sip nariye Jiu thi unighi Thaga Valanani kaiwae. ⁸ Iyake kaiwae na yaja ghandathanavu valikaiwae ngoreiye Loi le gharighari boboma. Iya kaiwae ra vakatha thagake iyake, thava weiye bred thi basi weiye isit teuye, iye thari na thari thanavuniye, ko weiye enge bred ma weiye isit thi basi, kaiwae iye thanavu i rumwaru na utu emunjoru.

⁹ Letama iyava ya rori na ya variyema e ghemi, va yaja thava te weimiyangiyava rayathiyathima hu yayaku na regha. ¹⁰ Ya utu ngoreiyako, ko rayathiyathima thiye ma thi lonweghathi ma utuninji ngoreiye. Thongo ma hu yayaku na regha weimiyangiya rayathiyathima thiye ma thi lonweghathi, anga ne hu rakarena enge? Ne hu rakaiteta yambaneke! Tembe ngoreiyeva thavala thi vothana, rakaivungi, o thiye thi kururu wengiye loi kwanikwan, thiyake ma valikaiwae hu botewoyathungi. ¹¹ Ko lo utuko iyava ya rorinjonako gharumwaru ngoreiyake: thavala thina thiye ralonweghathi ko iyemaenge thiye rayathiyathimangi, thava hu yayaku na regha weimiyangi. Tembe ngoreiyeva, thongo lolo regha ina iye i lonweghathi, ko iyemaenge iye i vothana, o iye i kururu weya loi kwanikwan, o thongo iye rautu basibasi, o ramunumu, o rakaivi, ee iyake thava weimi hu yayaku na regha. Lolo ngorako thava hu ghaninga na regha weimi.

¹²⁻¹³ Thavala ma thi lonweghathi emunjoru

weya Loi, ma lo mbaro regha ina wenji na ya tuthiya ghanjithanavu ghathovuye na ghathari. Loi tembene i tuthiya ghanjithanavuko ghathovuye na ghathari. Ko iyemaenge ghemi valikaiwami moli hu tuthiya lemi valiralonwelonweghathi ghanjithanavu na hu vakatha ghanjimbaro. Buk Boboma ija, “Hu vanjuranjiya thari gharavakatha e lemi wabwina tine.”

6

Ralonwelonweghathi thi vakot lenji valiralonwelonweghathi

¹ Thongo ghemina regha i wogaithi weiye gheu regha, na i vanju na ve vanjugiya wenjiya kot gharavakatha, thiye ma thi lonweghathi e maranji, ngononga ghathovuyako? Ma methi wa wenji enge lenji valiralonwelonweghathi na thi vanamwe lenji wogaithiko iyako? ² Ko thare hu ghareghare, ghinda ralonwelonweghathi nevole ra vanivanjiya yambaneke gharighariniye thavala ma thi lonweghathi? Thongo nevole ra vakatha ngoreiyako, ngononga enge na ma valikaiwami hu vanamwe thari nasiye e tinemina? ³ Ko ma hu ghareghareva ghinda nevole ra vanivanjiya nyao thovuthovuye na raraithari? Thongo nevole valikaiwanda iyako, valikaiwami moli mbanake hu vanamwe lemi yakuyaku e yambaneke bigibiginiye utuutuniye. ⁴ Iya kaiwae thongo bigibigi ngonranjiyako thi yoyomara e ghemi, mbala

hu wa weya ralonwelonweghathi regha na valikaiwae i vanamwe, othembe iye ma e idaida. ⁵ Mana iyake kaiwae valikaiwae hu monjina: ko ma lolo regha ina e tinemina, iye nuwae i goi na valikaiwae i vanamwe ralonwelonweghathi theghewo lenji wogaithi? ⁶ Ko iyemaenge ralonwelonweghathi regha i vangwa le valiralonwelonweghathi na ve vangurawe e kot, na kot gharavakatha, thiye ma thi lonweghathigha Jisas thi vanivana!

⁷ Ghemi, kaiwae hu vangungiya lemi valiralonwelonweghathi na hu vangurawengi e kot, iyake ghaghareghare ghemi kaero hu dobu moli. Mbala mbema hu vatomwenga enge na ghamune thi vakatha vathari e ghemi. Mbala mbema hu vatomwenga enge na thi kwaniyaronga. ⁸ Iyemaenge ghemi hu vakatha vathari wengiya ghamune, na hu kwaniyarongi! Mbwana. Hu vakatha ngoreiyako wengiya lemi valiralonwelonweghathi.

⁹ Ko ana ma hu ghareghare thavala ghanjithanavu i thari mane vethi ru Loi ele gamba mbaro tine? Thava hu vatomwe na lolo regha i kwaniyaronga: rayathiyathima, thavala thi kururu wengiya loi kwanikwan, ragheghe thiye rayathiyathima, amaamala na theghathegga thiye ghimoghimoru thi vamodo na thi vakaiwona riwanji yathima kaiwae, thavala weinjijangi lenji valighimoghimoru thi vavaghena, ¹⁰ rakaivi, ranumo bigibigi, ramunumu, raliutu na rautukwanikwan, thiye mane vethi rakaru Loi ele gamba mbaro tine. ¹¹ Ghemi vavana ghamithanavu va ngoreiyako. Ko

iyemaenje Giya Jisas Krai e idae na la Loi Une le vurigheghe e tine, Loi kaerova i thavwanga na i vabobomana, na kaero i wovarumwarumwarunganga.

Hu vakaiwoŋa riwamina Loi le vwenyevwenye kaiwae

¹² Vavana huŋa, “Ma e wodageten, bigibigike wolaghiye valikaiwangu ya vakatha.” Ngoreiye, ko iyemaenje ma bigibigike wolaghiye ne thi thalavuinda na e ghandathovuye. Vavana huŋa, “Ma e wodageten, bigibigike wolaghiye valikaiwangu ya vakavakatha,” ko iyemaenje thava bigi regha i mbaronango. ¹³ Vavana huŋa, “Ghaninga ngamoinda kaiwae, na ngamoinda ghaninga kaiwae.” Ngoreiye, ko iyemaenje Loi ne iŋa na mbe theghewoko vara nanderengi. Riwandake ma yathima kaiwae ngoreiye. Ra vakaiwoŋa enge riwandake Giya kaiwae, Giya iye i njimbukikiya riwandake. ¹⁴ Loi le vurigheghe e tine ne i vanġuthuweiru riwandake mare e tine ngoreiya va i vanġuthuweiruya ghandi Giya Jisas mare e tine.

¹⁵ Kaero hu ghareghare riwamina iye Krai riwae nginauye. Thare valikaiwae lolo regha ne i wo Krai riwae nginauye na i wovatatd weiye wevo i vakunena riwae yathima thanavuniye? Nandere moli! ¹⁶ Ko thare hu ghareghare, thonġo ghimoru regha weiye wevo i vakunena riwae yathima thanavuniye, e riwanjiko iye weiye wevoko kaero ngoreiye riwanjiko regha. Kaiwae Buk Boboma iŋa, “Theghewoko

ngoreiya riwanjiko regha.” ¹⁷ Ko thonjo thela weiye Giya i tubwe na regha, e une iye ngoreiya kaero weiye Giya thi yaku na regha.

¹⁸ Hu voiteta yathima thanavuniye. Tharike wolaghiye ra vakavakatha thi mena eto e riwandake, ko thonjo ra yathima, kaero ra vakatha thari e riwandake, na ra vakowana. ¹⁹ Ko ana ma hu ghareghare riwamina ngoreiya ngolo boboma Nyao Boboma kaiwae, iye Loi i wogiya e ghemi na i yaku e ghemi. Ghemi ma ghamimbereghawe, ghemi Loi we, ²⁰ kaiwae kaerova i vamodo njoghanga na modami laghiye moli. Iya kaiwae hu vakaiwoŋa riwamina Loi le vwenyevwenye kaiwae.

7

Ghe utuniye

¹ E mbanake iyake nuwanguiya ya thombeya lemi leta va hu rori na i mena e ghino, na ya varumwarungiya utuutu vavana va hu vaitongi.

Thonjo ghimoru regha i yaku na ngoreiya ghibighibi, i thovuye iyako. ² Ko kaiwae yathima thanavuniye i laghiye, iya kaiwae ghimoru regha na regha mbe ele levo na tembe ngoreiyeva wevo regha na regha mbe ele ghimoru. ³ Ghimoru mbe i vatomweya riwae weya levo na wevoko tembe i vakatha ngoreiyeva iyako weya le ghimoru na thi vamboromborona lenji renuwana. ⁴ Wevo ghamberegha ma i mbarona riwae, ko le ghimuruko iya i mbaronava. Na tembe ngoreiyeva

ghimoruko ghamberegha ma i mbaronja riwae, levoko iye i mbaronjava. ⁵ Iya kaiwae ghemi ragheghe tha hu vevagharegharenja, thonjo mbe themighewona vara lemi renuwana regha na hu vevagharegharenja mbanja ubotu, na mbala hu giya ghamimbanja nanjo kaiwae, ko iyemaenge tene hu ghenana reghava. Thonjo ne hu vakatha ngoreiyako, vakathako iyako ghaminae mane i vurigheghe e ghemi, mbala Seitan ma i mandonga. ⁶ Ma ya wogiya ghamimbaro, ko thonjo nuwamiya hu vakatha ngoreiye, ya vatomwe e ghemi. ⁷ Lo renuwana ko nuwanjuiya mbala taulaghina ghemi hu ghibighibi ngoramiya ghino. Ko iyemaenge regha na regha Loi kaerova i giya ghandabebe. Vavana ghandabebe mbe regha na vavana ghanjibebe mbe regha.

⁸ Thavala ma thi ghe na wambwiwambwi ya dage e ghemi valikaiwae thava hu ghe, na ngoramiya ghino. ⁹ Ko thonjo yathima gharerenuwana i vurigheghe moli e ghemi na ma valikaiwami tembe hu ravaghanja ghamimberegha, mbema hu ghe enge. I thari enge thanavuko iyako ghaminae i vurigheghe e ghemi.

¹⁰ Ragheghe ghanjimbaro ngoreiyake. Iyake ma ghino lo mbaro ngoreiye, Giya le mbaro. Ragheghe wevo thava i botewoyathu le ghimoru. ¹¹ Ko thonjo i roitete, thava te i gheva, o thonjo nandere, i wa weya le ghimoru na thi vanamwe na ghamwanji kaero vanaorava. Na tembe ngoreiyeve, ragheghe ghimoru thava i botewoyathu levo.

¹² Ghemi ralonwelonweghathi na lemi ovo ma thi lonweghathigha ghamivavurigheghe ngoreiyake. Iyake ma Giya ghalinae, ghino ghalinangu. Thongo ghimoru i lonweghathi na levo ma i lonweghathi, na thongo wevoko nuwaiya mbe i yaku weiye ghimoruko, ghimoruko thava i botewo wevoko. ¹³ Tembe ngoreiyeva, thongo wevoko ralonwelonweghathi na ghimoruko nuwaiya i yaku weiye wevoko, wevoko thava i botewo ghimoruko. ¹⁴ Ya utu ngoreiyako kaiwae ghimoruko iya ma i lonweghathiko levoko le lonweghathi kaiwae iye kaero i thina Loi e marae. Na tembe ngoreiyeva, wevoko iya ma i lonweghathiko, thongo le ghimoru i lonweghathi, iye kaero i thina Loi e marae. Thongo ma ngoreiya lo utuke, lemi ngangana mbala ngoranjiya thavala ma thi ghareghareya Loi lenji nganga. Ko iyemaenge kaero ngoreiye, thiye kaero thi thina Loi e marae. ¹⁵ Ko iyemaenge, thongo thela ma i lonweghathi nuwaiya iteta levo o le ghimoru ralonwelonweghathi, hu viyathu na i vakatha ngoreiye. Thongo kaero ngoreiyako, ralonwelonweghathi ghimoru o wevo, ma mbaro vurigheghe regha inawe na thava i vatomweya levo o le ghimoru na i roitete, kaiwae Loi le kula ngoreiye na nuwaiya ra yayaku na bubuyamo. ¹⁶ Ghen ralonwelonweghathi wevo, valikaiwan u vamoru len ghimoru na i tabo na ralonwelonweghathi o nandere, ma valikaiwae u ghareghare. Ghen ralonwelonweghathi ghimoru, valikaiwan u vamoru len wevo i

tabo na ralonwelonweghathi o nandere, ma valikaiwae u ghareghare.

*La yakuyaku ngoreiya va ra menakowe mbanja
Loi i kula weinda*

¹⁷ Regha na regha mbala le yakuyaku ngoreiya Giya Jisas le wogiyawe, na e yawaliye mbala ngoreiya mbanja Loi va i kulawe. Ya vav-agharena iya mbaroke iyake ekelesiya wabwi wengi e valivanngake wolaghiye. ¹⁸ Thongo ghimoru regha kaero thi kitena riwae mbothiye njimwae ngoreiya Mosese le mbaro ko amba muyai Loi i kulawe, thava i munjeva i ravunyivunyiya tenitoko iyako. Thongo ghimoru regha ma i vakatha kamwathiko iyako na Loi kaero i kulawe, thava te thi vakathaweve. ¹⁹ Iya kaiwae ma bigi ngoreiya ghimoghimoru thi wo tenito thanavuniye o nandere. Bigi laghiye enge vara na gharerenuwana i laghiye, ra ghambugha Loi le mbaro. ²⁰ Regha na regha mbala ra yaku ngoreiya va la yakuyakuko amba muyai Loi i kula weinda. ²¹ Thongo ghen lolo regha va le rakakaiwobwaga ghen na Loi i kula e ghen, tha i vakathange na u rerenuwana kaiwae, ko thongo u vaidiya ghanimbanja thovuye regha na valikaiwan u tabona ngoreiya rakarakayathu loloniye, u vakatha ngoreiye. ²² Thela iye va rakakaiwobwaga mbanja Giya i kulawe na i tabo ralonwelonweghathi, iye ngoreiye rakarakayathu loloniye. Tembe ngoreiyeva, the lolo rakarakayathu loloniye, na Giya i kulawe, iye kaero i tabona Kraisa le rakakaiwobwaga na i mbarona. ²³ Loi kaerova i vamoto njoghanja

na modami laghiye moli, iya kaiwae thava hu tabo na lolo regha le rakaiwobwagava. ²⁴ Lo bodaboda, regha na regha mbala hu yaku ngoreiya mbanja va lemi yakuyaku na Loi i kula e ghemi na hu tabo ralonwelonweghathi.

Gagamaina na wambwiwambwi utuninji

²⁵ E mbanjake iyake lemi vaito gagamaina kaiwanji, ya giya ghatombe. Giya ma i utunja e ghino mbaro regha gagamaina kaiwanji na valikaiwae ya utunja e ghemi. Ko Giya i gharevirinango na ya tabo le rakakaiwo emunjoru, iya kaiwae lo utuutu valikaiwae hu vareminje, na ya woranjiya lo renuwana.

²⁶ E mbanjake iyake vuyowo i ghanagha thi rakarakarangi, iyake kaiwae lo renuwana ngoreiyake: thonjo lolo regha ma i ghe, i thovuye enge i yaku ngoreiyako. ²⁷ Ghimora ghen, thonjo e len wevo, thava u tamweya kamwathi na u botewo len wevona. Thonjo ma u ghe, thava u rovurigheghe ghe kaiwae.

²⁸ Thonjo u vanjwa wevo eunda, ma thari ngoreiya iyako. Na thonjo gamaina eunda i vanjwa ghimoru regha, ma i vakatha thari iyako. Ko thavala thi ghe ne thi vaidiya vuyowo i ghanagha moli. Iya kaiwae ma nuwanjiya vuyowanjiko thiyako thi yomara e ghemi.

²⁹ Lo bodaboda, lo utuke gharumwaru ngoreiyake. Mbanja ma i molao, iya kaiwae e mbanjake iyake na i ghaoko thavala e lenji ovo mbema thi vatomwenji enge weya Loi, ngoreiya ma thi ghe, ³⁰ thavala thi randa ngoreiya ma thi ghareviri, thavala thi vaviri

ngoreiya ma thi warari, na thavala thi vamodo lenji bigibigi, ngoreiya bigibigiko iyako ma thiye wengi, ³¹ na thavala thi vavakaiwoŋaŋgiya yambaneke bigibiginiye, ngoreiya ma thi vavakaiwoŋaŋgi. Kaiwae yambaneke ghathuwathuwa kaero iya vara ne ikoke.

³² Ma nuwaŋguiya lemi rerenuwaŋa thi vuy-owo. Ghimoruko iya ma i gheko valikaiwae i rerenuwaŋa Giya le kaiwo kaiwae, nuwaiya i vamboromboroŋa Giya le renuwaŋa. ³³ Ko ghimoruko iya i gheko, i rerenuwaŋa yambaneke bigibiginiye kaiwae, kaiwae nuwaiya i vamboromboroŋa levoko le renuwaŋa, ³⁴ iya kaiwae i ndendeghathi renuwaŋa theghewo e tine. Wevo i thamatuwa na amba ma i ghe na gamaina mbala thi rerenuwaŋa laghiye Giya le kaiwo kaiwae, nuwanjiya thi vabobomaŋa riwanji na gharenji weya Giya. Ko wevoko iya i gheko i rerenuwaŋa laghiye yambaneke bigibiginiye kaiwae, kaiwae nuwaiya i vamboromboroŋa le ghimoruko le renuwaŋa. ³⁵ Ghami thalavu kaiwae iya ya utu na ngoreiyake, ma nuwaŋguiya lo utuutu ngoreiya bigi regha na i wo na i mbaroŋaŋga. Ko iyake nuwaŋguiya hu ghambugha thanavu thovuye ghakamwathi na nuwaŋguiya thava bigi regha i kiteniŋga lemi renuwaŋa Giya le kaiwo kaiwae.

³⁶ Gagamaina utuninji lo renuwaŋa ngoreiyake. Thongo amala regha i dage tena yawarumbuye gamaina na thava i ghe, ko muyai i renuwaŋa le dageteniko iyako ma i thovuye, na yawarumbuyeko kaero i thamatuwa moli

na valikaiwae moli i ghe, i vakatha ngoreiya le renuwanako na i vatomweya yawarumbuyeko i ghe. Iyake ma thari ngoreiye. ³⁷ Thongo amala regha yawarumbuye gamaina na i vakatha ghambaro na thava i ghe, na thongo kaero le renuwanako ngoreiye na ma i numoghegheiwu, amalako iyako le renuwanako i thovuya iyako. ³⁸ Iya kaiwae amalako i vakatha yawarumbuye na i ghe, i vakatha wagiya iyako, na amalako iya ma inana yawarumbuye i ghe i vakatha wagiya moli.

³⁹ Thongo wevo eunda le ghimoru mbe e laghalagha, ma te valikaiwaeva i roitete. Ko iyemaenge thongo le ghimoru i mare, valikaiwae the ghimoru nuwaeko nuwaiya i vanu, ko ghimoruko iyako enge thongo iye ralonwelonweghathi. ⁴⁰ Ko ghino lo renuwanu thava te i gheva na le warari ne i laghiye. Na ya renuwanu Nyao Boboma ina e ghino iya ya utunangiya utuutuke thiyake.

8

Ghaniŋga thi vabobomana loi kwanikwan wenji utuniye

¹ E mbanake iyake nuwanugiya ya thombeya lemi govaito ghaniŋga thi vabobomana wenjiya loi kwanikwan kaiwae.

Taulaghike ghinda ra ghareghare utuutuke thiyake, iya inake, "Taulaghike ghinda e la ghareghare." Emunjoru, ko iyemaenge la ghareghareko iyako i wovorenjinda na weinda la sirari, ko gharethovu i vatadiinda la

lonweghathi na valikaiwanda ra thalavunjiya gharighari vavana. ² Thela thonjo ina iye i gharegharevao bigi regha, amba ma i ghareghare ngoreiye valikaiwae i ghareghare. Ko iyemaenge le ghareghareko iyako amba ma i vamboromborona ngoreiya iye ele ghareghare. ³ Ko thela i gharethovwa Loi, Loi i ghareghare loloko iyako iye le lolo.

⁴ Iya kaiwae, ghaninga thi vowo wenjiya loi kwanikwan gharerenuwana ngoreiyake. Kaero ra ghareghare loi kwanikwan thiye ma loi emunjorungi. Ra ghareghare Loi emunjoru mbe ghamberegha enge na ma te reghava. ⁵ Gharighari vavana lenji renuwana thijava loi lemoyo inanzi e buruburu na e yambaneke, na loingiko na giyagiyako thiyako lemoyo. ⁶ Iyemaenge othembe thina ngoreiyako, ghinda weinda Loi mbe ghamberegha enge, iye Ramanda, iye bigibigike wolaghiye ghanjiravakatha, na iye le gharighara ghinda. Na Giya mbe ghamberegha enge, Jisas Krai, weya amalaghiniye bigibigike wolaghiye thi yomara, na weya amalaghiniye ghinda e yawayawalinda.

⁷ Ko iyemaenge ralonwelonweghathi vavana ma thi ghareghare wagiawe loi kwanikwanima bigi ngoreiyengi. Vavana va thi kurukururu wenji, na e mbanake iyake, thonjo thi ghana ghaninga ngoranjijako, thiye mbe inanziwe thi renuwanakikiya ghaningako iyako kaero thi vowo wenjiya loi kwanikwan. Lenji ghareghareko i tubo na ma nuwanji i rumwaru loi kwanikwan kaiwanji, na e ghaminanjiko

laghiye ngoreiya ghaningako iyako kaero i vambighiyangi. ⁸ Ko iyemaenge ghaningake iya ra ghanike o ma ra ghan ma i vakathainda na ra thovuye Loi e marae. Mane ra vakowana la vighathi weinda Loi, thongo ma ra ghana ghaninga vavana, na tembe ngoreiyeva, thongo ra ghana ghaninga vavana, ma i vakatha la vighathi i vurigheghe weinda Loi.

⁹ Hu njimbukikinga. Kaiwae hu ghareghare wagiawe ma e ghamidageten na thava hu vakatha bigi regha na lemi vakathako iyako kaiwae na ralonwelonweghathi thiye lenji ghareghare ma i laghiye thi dobu. ¹⁰ Iya kaiwae, ghen e len ghareghare, thongo u wa vo ru loi kwanikwan ele ngolo kururu tine, vo yaku e ghamba ghaninga na u ghaninga, na thongo ralonwelonweghathi iye le ghareghare ma i laghiye i thuwenge, nuwae ne i ghangho e ghen na i ghana ghaningana iya kaero thi vowo wengiya loi kwanikwan; ngoreiya iyako ae? ¹¹ Ghanivanjavanga, iye le ghareghare ma i laghiye na iye Krai va i marewe, len gharegharena i vakatha na i mukuwo. ¹² Mbanja hu vakatha thari wengiya ghamivanjavanga thiye lenji ghareghare ma i laghiye na thi dobu, weya Krai kaero hu vakatha thari. ¹³ Iya kaiwae, thongo ya ghana ghaninga na ya vakatha wovanjavanga i dobu ele lonweghathi, ma tene mbanja reghava ya ghana thetheghan mbunimaniye, mbala ma ya vakatha wo vanjavanga regha na i dobu ele lonweghathi.

9

Pol iye ghalinae gharaghambi na ghakaiwo budakai

¹ Emunjoru ma bigi regha i ganateniŋgo! Emunjoru ghino ghalinae gharaghambi regha! Ghino kaero ya thuwe ghandu Giya Jisas! Lo kaiwo Giya kaiwae uneya ghemi. Hu varaenna thiyako, ngoreiye? ² Othembe gharighari vavana thiŋa ma ghalinae gharaghamba ghino, ko ghemi valikaiwami moli hunja ghalinae gharaghamba ghino. Kaiwae ghemi lemi lonweghathina i woranŋiya wenŋiya gharighari, emunjoru ghino Giya ghalinae gharaghambi.

³ Mbaŋa gharighari thi ghatango ya thombeya ghalinanjiko ngoreiyake: ⁴ Ko ana ghime ma valikaiwae ghemi hu giya ghaninŋa na mbwa weime e lama kaiwoke tine? ⁵ Thavala e tinemeke thi ghe, valikaiwae weinjiyanŋiya lenji ovo thi lonweghathi thi vaghiliya, ngoreiye? Ngoreiya ghalinae gharaghambiko wolaghiye weinjiyanŋiya Giya Jisas oghaghae na tembe ngoreiyeva Pita, thi vakavakatha. ⁶ O tembe ghino na Banabas wo rovurigheghe e nimame riwameke ghathalavu kaiwae? ⁷ The ragagaithi tembe ghamberegha i njimbukikiya le njimbonjimbo na ghae? The lolo mbema i kakaiworawe enge umauma na ma i ghanimun une? The lolo mbema i njimbunjimbukiki enge le sip na ma i ndevaidi mun le sipiko ghathovuye?

⁸ Lo renuwaŋa ma mbe i mena enge gharighari wenŋi na ya utuŋa utuutuke thiyake.

Mbaroko Loi va i wogiya Mosese mbe i utunjava ngoreiya iyako. ⁹ Mosese le mbaro i utunja ngoreiyake, “Mbaṅa ne hu vakaiwoṅa burumwaka na thi vurivwaravwara wit na mbombouye thi dobudobu, thava hu ngarimbiya ghae, mbe i ghana le kaiwona modae.” U renuwaṅa Loi va i rerenuwaṅa thetheghaniko kaiwae iyava i utu na ngoreiyako? Nandere. ¹⁰ Ghime gharigharike utunime iyava Loi i utu na ngoreiyako. Mbwana, ghime kaiwame iya utuko iyako i woranḡiya. I woranḡiya weinda, mbaṅa rariyoriyo thi riyo na ravathevathe thi vathe, valikaiwanji thi vareminje ghanjithalavu ne i mena e lenji kaiwoko. ¹¹ Ghime kaerova wo kabu Loi le utu e gharemina, na ma i tomethi thonḡo lama kaiwoke une, mbunima na madibe ghathalavu i mena e ghemi. ¹² Thonḡo rakakaiwo vavana valikaiwanji thi vaidiya thalavuke iyake e ghemi, thare valikaiwae ghime wo vaidiya ghamathalavu laghiye moli e ghemi?

Ko ma mbaṅa regha wo vakatha na valikaiwame woṅa na hu thalavuime ngoreiyako. Vuyowoke wolaghiye wo ghatanaghathinḡi, kaiwae ma nuwameiya wo woraweya ghamba thalativa regha Toto Thovuye kaiwae na gharighari lenji lonweghathi i vuyowo. ¹³ Ko thare hu ghareghare, thavala thi kaiwo e Ngolo Boboma tine, ghanji i mena gheko, na thavala ghanjikaiwo vowo thi mbana ghanjivowo e tine. ¹⁴ Tembe ngoreiyeva, Giya i dage vurigheghe Toto Thovuye gharautu

ghanjithalavu i mena wenjiya thavala thi lonjweya Totoko Thovuye iyako.

¹⁵ Valikaiwangu enge yana na hu thalavungo, ko iyemaenge ma mbanja regha ya utuja na hu vakatha. Ma ya rori mbanjake na mbala hu vakatha ngoreiye. Thava! Mbala wo ya marekai enge amba ya vaidi thalavu i mena e ghemi. Ma nuwanguiya lolo regha i dageten lo vorevorenjango. ¹⁶ Loi kaerova i tuthingo na ya utuja Toto Thovuye, na thongo ya vakatha ngoreiye, ma valikaiwae iyako kaiwae na ya wovorevorenjango. Aleu! Thongo ma ya vavagharena toto thovuye, nevole va vaidiya vuyowae laghiye! ¹⁷ Thongo lo renuwana na ya vakatha kaiwoke iyake, valikaiwangu enge e modamodangu. Ko iyake ma womberghake lo renuwana ngoreiye, Loi i wovengo kaiwoke iyake na ya njimbukiki, ¹⁸ iya kaiwae ne ya wo the modo? Modangu ngoreiyake. Ya warari kaiwae ya yathu Toto Thovuye wenjiya gharighari, na ma mbanja regha yana na thi giya thalavu e ghino lo kaiwoke modae. Mbema modangu enge warari.

¹⁹ Ghino ma lolo regha le rakakaiwobwaga, ko ya vatomwengo ya tabo gharigharike wolaghiye lenji rakakaiwobwaga, kaiwae nuwanguiya ya viva gharighari lemoyo nuwanji. ²⁰ Mbanja ya kaiwo wenjiya Jiu, wothanavu ngoreiya Jiu, kaiwae nuwanguiya ya viva Jiu nuwanji. Mbanja thongo ya kaiwo wenjiya gharighari thi yaku Mosese ele mbaro tine, wothanavu ngoreiya thiye thi yaku e mbaroko iyako tine, kaiwae nuwanguiya ya viva nuwanji,

na othembe ghino ma ya yaku Mosese ele mbaro tine. ²¹ Thavala ma Jiu na ma thi yaku Mosese ele mbaro tine, mbanja inangu e tinenji, wothanavu ngoreiya thiyeko iya thi yaku e mbaroko iyako ghereiye, kaiwae nuwanguiya ya viva nuwanji. Ma yaja ya yaku Loi ele mbaro ghereiye, ko emunjoru enge ya ghambugha Kraisle mbaro. ²² Mbanja inangu thavala lenji lonweghathi i njavovo, wothanavu ngoreiya thiyako lenji lonweghathiko i njavovo, kaiwae nuwanguiya ya viva thiye lenji lonweghathiko i njavovo nuwanji. Ya mbanivathavatha gharighari tomethi ghanjithanavu, kaiwae nuwanguiya ya vakaiwoja kamwathi tomethi, na e kamwathingiko thiyako ya vamorongiya vavana. ²³ Ya vakathangiya bigibigike wolaghiye thiyake Toto Thovuye le mbuthu kaiwae, mbala weinguyangiya thavala thi lonweghathigha Totoko Thovuye wo vaidiya Loi le mwaewo.

²⁴ Kaero hu ghareghare rukuruku kiwala e tine rarukuruku lemoyo, ko iyemaenge e tinenji mbe reghaenge ne i wo modae. Ghemi hu ruku ngoreiyako mbala hu wo modami. ²⁵ Rarukurukuko wolaghiye thi yamwaliya riwanjiko. Thiye thi rovurigheghe modoko iya ma i meghabanako kaiwae na mbala thi wo, ko iyemaenge ghinda ra rovurigheghe na rowo modoko iya i meghabanako. ²⁶ Iya kaiwae ghino ya ruku na mbe i ghako vara moli. Ma ya rukuruku matavi. Ma ngorangwa ragagaithi, iye i mbumbu bwaga nimanimae. ²⁷ Iya kaiwae ya yamwaliya riwangu na ma ya vatomwe renuwanja bwagabwaga kaiwae, na thava mbe

ya giya enge ghandauneko yanawanji na thiye thi ruku, na ghino ya dobu na ma ya wo modoko.

10

La ghamba thuwathuwa Isirel riuriuninji

¹ Lo bodaboda, hu renuwanakikiya orumburumbunda me vivako taulaghiko inanji ngaliliko e raberabe na taulaghiko thi rakalawa e njighi.

² E ngaliliko na e njighiko taulaghiko thi bapitaiso na thi tabo Mosese le wabwi. ³ Tembe ngoreiyeva, taulaghiko thi ghana ghaningako iya Loi Une i giyako wenji ⁴ na taulaghiko thi muna mbwa iya Loi Une i giyako wenji kaiwae i mena e variko Loi Une va i vakatha na weinji e lenji longalonga tine, na variko iyako iye Krai. ⁵ Othembe taulaghiko va ngoranjijako, ko iyemaenge thi ghanagha moli Loi mava i warari kaiwanji, thiye amalaghiniye i tagavamare na i bigirawe takwa riwanji ngoreiya va thime rereyako vurivuri vwatavwata.

⁶ Bigibigike thiyake thi yomara wenji na ghinda la ghamba thuwathuwa, na thi vanuwoviriinda thava te ra rerenuwajava thari thanavuniye ngoreiya thiye. ⁷ Ghinda thava ra kururu wenjiya bigibigi vavana na ngorandangiya thiye vavana lenji vakatha. Ngoreiya Buk Boboma le worangiya, ina, "Thiya yaku na thiya ghaninga, thi munumu na thi rakaviri na thiya thariya yathima ghathari."

⁸ Thava ra vakatha yathima thanavuniye ngoreiya thiye vavana va lenji vakatha, na

mbanja regha e tine tuwanti tiri tausan (23,000) thiya mare. ⁹ Thava ra mando Kraisi ngoreiya thiye vavana lenji vakatha, mwatamwata thi gharinji na thiya mare. ¹⁰ Na tha ra liyautu na ngorandangiya thiye vavana, amba Loi i variya nyao thovuye na i gabovaongi.

¹¹ Bigibigike wolaghiye thiyake va thi yomara wenji na ghinda la ghamba thuwathuwa. Na va thi rorinjona Buk Boboma e tine, thi vanuwoviriinda, kaiwae ghinda e mbanjake vara iyake ra yakuyaku mbanja ele ghambako.

¹² Iya kaiwae, thonjo ghemina regha i renuwana i ndeghathi ele ghamba ndeghathi na i vurigheghe, mbala i njimbukiki na thava te i dobuva. ¹³ Tanathethako iya hu vavaidiko mbema ngoreiya gharighari thi vavaidi mbanjake wolaghiye. Valikaiwae moli hu varemija Loi, kaiwae iye ma mbanja regha i vatomwe na ghamitanathetha i kivwalanga. Kaiwae mbanja ne hu vaidiya tanathetha, Loi ne i thalavunga na i vatomweya vo kamwathiniye regha, na mbala hu ghatanaghathi ghamitanathethanawe.

Thava hu kururu wenjiya bigibigi vavanava

¹⁴ Iya kaiwae, wouna na valigharegharenju, thava hu kururu wenjiya bigibigi vavanava.* Hu ndeghereiye wanangi. ¹⁵ Ghemi nuwamina i sonuga iya ya utuutuke e ghemi, na mbowo hu tuthiya lo utuke. ¹⁶ Mbanja ra mun waen e

* **10:14** E ghalighalija iya va thi rorikai Buk Boboma, righethoruke iyake inja, "Thava hu kururu wenjiya loi kwanikwan."

ghakom ra vakaiwoŋa Giya le ghaŋga e tine, iya ra vata ago weya Loi kaiwae, emunjoru ra mun na regha Krai madibae. Na mbaŋa ra njiviyaviya brediko na ra ghan, emunjoru ra ghaŋga na regha Krai riwae. ¹⁷ Kaiwae bred mbumbura, iyake i vatomwe taulaghike ghinda ririwo regha, kaiwae taulaghike ghinda ra ghan brediko mbumbura.

¹⁸ Wo hu rerenuwaŋa Isirel gharighariniye ghanjithanavu kaiwae. Mbaŋa thi vowo weya Loi, thiye tembe thi ghaŋga na regha iya vowo ghaŋganiye vavana. ¹⁹ Ma yaŋa loi kwanikwaningiko thiye bigi laghiye. Na ma yaŋa ghaŋgako iya thi vowo wenjiya loi kwanikwan i tomethi wenjiya ghaŋgake wolaghiye. ²⁰ Lo utuke gharumwaru ngoreiyake: mbaŋa thavala ma thi ghareghareya Loi thi vowo, thi vowo wenjiya nyao raraithari; ma thi vowo weya Loi. Ma nuwanjiya ghemi ghamwami vanaora weimiyangiya nyao raraithari. ²¹ Ma valikaiwami hu muna waen Giya e ghakom, na tembe hu muniva nyao raraithari e ghanjikom. Tembe ngoreiyeva, ma valikaiwami hu ghana bred Giya ele ghamba ghaŋga, na tembe hu ghaŋgava nyao raraithari e lenji ghamba ghaŋga. ²² Ko ana nuwamiya hu vakatha Giya i yamwanja? O hu renuwaŋa lemi vurigheghena i kiwala amalaghiniye?

Hu vakathangiya bigibigike wolaghiye Loi le wwenyewwenye kaiwae

²³ Vavana huḅa, “Ma e ghandadageten, valikaiwanda mbema ra vakavakatha enge bigibigike wolaghiye.” Ngoreiye, ko iyemaenge bigibigike wolaghiye mane i thalavuinda. O huḅa, “Ma e ghandadageten, valikaiwanda mbema ra vakavakatha enge bigibigike wolaghiye.” Ngoreiye, ko iyemaenge bigibigiko wolaghiye mane i vatadiinda. ²⁴ Tha lolo regha i rerenuwana ghambergha ghathovuye kaiwae, ko i rerenuwanaenge gharighari vavanava ghanjithovuye kaiwae.

²⁵ I thovuye enge thongo vohu vamoda thetheghan mbunimaniye e ghamba maket na hu ghan. Thava i vakatha gharelaghilaghi e ghemi, na hu vavaito kaiwae. ²⁶ Mbema hu ghaningaenge, kaiwae Buk Boboma iḅa, “Yambane na yambaneke bigibiginiye wolaghiye Giya le bigibigi.”

²⁷ Tembe ngoreiyeva, thongo lolo ma ralonwelonweghathi i kula vathanga na vohu ghaninga ele ngolo, na thongo lemi renuwana ngoreiye, thava hu gharelaghilaghi na hu vavaito ghaningako kaiwae, ko iyemaenge ma hu ghaningaenge iya i giya wengana. ²⁸ Ko thongo lolo regha i dage e ghemi na iḅa, “Ghaningake iyake kaero thi vowo wengiya loi kwanikwan,” thava hu ghan, kaiwae loloko iya i giya yanawamiko i renuwana thongo hu ghana ghaninga ngoranjyako kaero hu thari Loi e marae. ²⁹ Ghemi ma lemi renuwana ngoreiya, ko kaiwae lolo regha le renuwana ngoreiya, iya kaiwae thava hu ghan.

Ko thongo ma lolo regha i utu na ngoreiyako mbala thava ra rerenuwana kaiwae, mbema ra ghaninga enge. Kaiwae ra ghareghare ma ghandadageten, buda kaiwae lolo regha ele renuwana valikaiwae i mbaronjainda? ³⁰ Thongo kaero ra vata ago weya Loi ghaningako iyako kaiwae, buda kaiwae lolo regha i wovatharitharinjainda?

³¹ Iya kaiwae, the ghaninga hu ghan o budakaiya hu mun na budakaiya hu vakatha, hu vakathangiya bigibigike wolaghiye Loi le vwenyevwenye kaiwae. ³² Thava lemi vakatha ngoreiya ghambativa regha wenjiya Jiu, o thiye ma Jiu, o thavala inanji Loi ele ekelesiya tine wenji. ³³ Hu vakatha ngoreiya ghino lo vakatha; ya mando na elo vakathake wolaghiye tine gharigharike wolaghiye thi warari kaiwae. Ma ya rerenuwana womberaghake wo thovuye kaiwae, ko ya rerenuwana enge gharigharike wolaghiye ghanjithovuye kaiwae, mbala thi vaidiya vamor.

11

¹ Hu wo wothanavuke, ngoreiya ghino ya wo Krai ghathanavu.

² Ya tarawenga kaiwae mbanake wolaghiye hu renuwana kikingo na vavaghareko iyava ya wo na ya vagharenga hu ghambu wagiawe.

³ Ko nuwanjiya hu ghareghareya iyake: ghimoghimoruke wolaghiye umbalinjiya Krai, wanakau umbalinjiya lenji ghimoghimoru, na Krai umbaliya Loi. ⁴ Iya kaiwae thongo ghimoru regha i yabo umbaliye na i nanjo na i utuna Loi ghalinae, kaero i vakatha umbaliye,

iye Kraisi, i monjina. ⁵ Ko thonjo wevo eunda ma i liyabo umbaliye na i nanjo na i utunja Loi ghalinae ekelesiya e maranji, i vakatha umbaliye, iye le ghimoru, i monjina. Thonjo ma i yabo umbaliye iye ngoreiya wevo i koru yathuvao umbaliye vulivuliye. ⁶ Kaiwae thonjo wevo eunda ma nuwaiya i yabo umbaliye, mbema i teniyathu vara. Ko iyemaenge ghathuwathuwa i monjimonjina thonjo i teniyathu o i koruyathu moli, iya kaiwae i thovuye enge thonjo i yabo.

⁷ Ghimoru ma valikaiwae i yabo umbaliye, kaiwae Loi va i vakatha ghimoru mbe amalaghiniye vara ngalingaliya, na i woranjiya Loi le vwenyevwenye. Ko wevo iye ghimoruko le vwenyevwenye. ⁸ Ya utu ngoreiyake, kaiwae Loi mava i wo wevo nginauye na i vakatha weya ghimoru, va i wowe enge ghimoru na i vakatha wevo. ⁹ Tembe ngoreiyeva, Loi mava i vakatha ghimoru wevo kaiwae, ko va i vakathaenge wevo ghimoru kaiwae. ¹⁰ Iyake kaiwae wevo i yabo umbaliye, na mbala i vaghareinda iye mbe ina le ghimoru ele mbaro tine, na tembe ngoreiyeva, nyao thovuthovuye kaiwanji. ¹¹ Ko iyemaenge Loi le gharighari e tinenji, wevoko iye le ghimoruwe na ghimoruko iye levowe. ¹² Kaiwae wevo i menawe ghimoru, tembe ngoreiyeva ghimoru i menawe wevo. Ko iyemaenge bigibigi wolaghiye thi mena weya Loi.

¹³ Ghemi mbowo hu renuwana. I thovuye enge thonjo wevo ma i yabo umbaliye na i nanjo weya Loi ekelesiya e maranji?

¹⁴ Ghinda gharighari ghandathanavu i

vaghareinda, thonngo ghimoru umbaliye vulivuliye molamolao monjimonjinae. ¹⁵ Ko thonngo wevo umbaliye vulivuliye molamolao iye le vwenyevwenye, kaiwae Loi va i wogiyawe umbaliye ghayaboyabo. ¹⁶ Thonngo lolo regha nuwaiya i wogaithina renuwanake iyake kaiwae, ne ya thombeya ghalinaeko na yana, “Ghime weimanjiya Loi le ekelesiya e valivanja regha na regha lama kururu kamwathiniye mbe ngoreiye vara iyako.”

Giya le ghaninga boboma

(Mat 26:26-29; Mak 14:22-25; Luk 22:14-20)

¹⁷ E mbanake iyake nuwanjiya ya vavaghare e ghemi bigi regha kaiwae. Bigike iyake kaiwae ma valikaiwae ya tarawenja, kaiwae mbanja hu mevathavatha lemi kururu e ghatovuye nasiye, mbema e ghathari laghiye enge. ¹⁸ I viva ya lonweya utunimi, mbanja hu mevathavatha, kaero hu tagaviyaviya wabwi e lemi ekelesiyana tine. Totoko iyako seiwo ya lonweghathi. ¹⁹ Emunjoru mbe e ghamitomethi e tinemina, na e tine mbala valikaiwae ra ghareghare, thavala nanji e tinemina thi ghambugha thanavuko iya Loi inja i rumwaru. ²⁰ Mbanja hu mevathavatha na hu ghaninga na regha, hu munjeva hu vakatha Giya le ghaninga boboma. Ko iyemaenge, iya ghemi hu vakavakathako ma ngoreiya Giya le ghaninga boboma thanavuniye, ²¹ kaiwae ghemi regha na regha hu maya na hu ghana ghamina, ma hu roroghagha ghamune kaiwanji. Iya kaiwae vavana hu ghanithigha, vavana bada mbe i gharighari wenja, na vavana

hu munumu laghiye moli. ²² Ko ma e lemi ngolo na valikaiwae hu ghaninga na hu munumuwe? Ma e lemi yavwatata Loi le ekelesiya kaiwae! Ghamune ma e lenji bigibigi hu vakavakatha ghanjimonjina! Nuwamiya ngoronga yana wenga? Valikaiwae ya tarawenga iyake kaiwae? Nandere moli!

²³ Va ya wo weya Giya Jisas va ya utuna wenga, ngoreiyake: Giya Jisas va e gougouniye ghaliliva, amalaghiniye i wo bred mbumbura, ²⁴ i vata ago weya Loi, i njiviyaviya, na ina, "Iyake riwangu, ghemi kaiwami. Hu vakatha valana iyake wo renuwanakiki kaiwae." ²⁵ Tembe ngoreiyeva, ghaningako e ghereiye, i thina waen ghakom na ina, "Waenike iyake, iye dagerawe togha kaiwae, dageraweko iyako ne i yomara e madibangu. Thembaña ne hu mun, hu vakatha worenukanakiki kaiwae." ²⁶ Iya kaiwae thembaña ne hu ghana bredike iyake na hu muna waenike iyake, iyake ngoreiya hu utuna Giya le mare utuniye ghaghada mbaña ne i njoghama.

²⁷ Iya kaiwae, thela thonjo i ghan na i mun bwagabwaga Giya ghabred na waen, na ma i vakatha ngoreiya thanavuniyeko, iye kaero i wovatharithariña Giya mbunimaniye na madibae na ne i vaidiya vuyowae. ²⁸ Iyake kaiwae iviva moli lolo regha na regha tembe ghamberegha wo i thuwe wagiyaawe, amba muyai i ghana bred na i muna waen. ²⁹ Kaiwae thonjo i ghana bred na i muna waen na ma i rerenuwana Giya mbunimaniye na le mare ghanjirumwaru, tembe ghamberegha i vakatha ghavuyowo. ³⁰ Iyake

kaiwae e tinemina thi ghanagha thi ghambwera na riwanji i njavovo na vavana kaero thi mare. ³¹ Ko thonjo tembe ghandamberegha ra thuwe wagiya weinda, mane ra vaidiya Loi le ghatha weinda. ³² Ko mbanja i ghathainda, iyako i vanamweinda, na mbala thava ne vara vaidiya Loi le wovatharitharija iya weindangiya thiye ma thi lonjweghathi.

³³ Iya kaiwae, lo bodaboda, mbanja thonjo hu mevathavatha Giya le ghaninga boboma kaiwae na huya ghaninga na regha, mbe hu veroghagha wenga. ³⁴ Thonjo thela bada i ghari, mbowo i ghaninga mbe ele ngolo amba muyai i mena, na mbanja hu mevathavatha na regha, thava ne hu vaidiya Loi le lithi. Mbanja ne ya ghaona, amba te ya varumwaruva bigibigi vavanava kaiwanji e ghemi.

12

Nyao Boboma i giya ralonjwelonjweghathi ghanjibebe

¹ Lo bodaboda, va hu roriya lo leta na hu vaitonjo Nyao Boboma le giya kaiwanji, na e mbanjake iyake nuwanjiya ya thombe e ghemi na ya varumwaru nuwami kaiwanji. ² Hu ghareghare wagiya we, mbanja vamba ma hu ghareghare Loi, bigibigi vavana va thi vanjunga na i vagaghala nuwamina na hu kururu wengiya vatavatad na ma e ghalighalijanji. ³ Iya kaiwae nuwanjiya hu ghareghare, thonjo Loi Une Boboma ina weya lolo regha ma valikaiwae ne i gura Jisas. Na thonjo lolo regha inja, "Jisas

iye Giya,” Nyao Boboma le vakatha e tine iya i utuutunawe.

⁴ Nyao Boboma le giya regha na regha i tometi, ko Nyao Boboma mbe reghaenge. ⁵ Tomethi kaiwo ra vakathanji gharighari vavana kaiwanji, ko mbe ra kaiwo enge weya Giya ghamberegha. ⁶ Regha na regha tometi la vurigheghe kaiwo kaiwae, ko Loi mbe ghambereghaenge, iye i giya taulaghike la vurigheghe kaiwoke wolaghiye kaiwanji. ⁷ Loi iye i woranjiya Nyao Boboma le vurigheghe weinda regha na regha gharigharike wolaghiye ghanjithalavu kaiwae. ⁸ Nyao Boboma i giya lolo regha ghabebe thimba ghautuutu na i utuutuwe, na Nyao Boboma iyako i giya lolo reghava ghabebe na i utuutu weiyee le ghareghare. ⁹ Nyao Bobomako iyako i giya weya lolo regha lonweghathi na le lonweghathi i laghiye moli valikaiwae Loi i vakatha bigi laghiye regha ngoreiya le nangoko, na weya lolo reghava i giya ghabebe na i vamorunjiya ghambweghambwera. ¹⁰ Nyao Boboma i giya vurigheghe weya lolo reghava na i vakathanjiya vakatha ghamba rotale i ghanagha, na weya reghava i giya ghabebe na i utuuta toto thi menawe Loi. Weya lolo reghava i giya ghabebe na valikaiwae totoko iya i mena weya Nyao Boboma na totoko iya i mena wenjiya nyao raraithari, ne i ghareghare ghanjitomethi. Weya lolo reghava i giya ghabebe na i utuutu e ghalighalija mbe regha, na weya mbowo reghava i giya ghabebe na valikaiwae i viva ghalighalijako iyako na i manjamanjala. ¹¹ Nyao Boboma mbe ghambereghaenge vara iya

i vakathangiya vakathake wolaghiye thiyake na i giya wenjgiya gharighari tomethi ngoreiya le renuwanja.

Riwanda regha, ko tomethi nginau

¹² Gharighari ghinda riwanda regha, ko nginauye lemoyo. Othembe nginauke e riwandake lemoyo, thi tubwe na regha na thi tabo ririwo regha. Na Kraisi riwae ngoreiyako. ¹³ Iyake ngoreiya taulaghike ghinda, thiye Jiu na thiye ma Jiu ngoreiye, rakakaiwobwaga na rakarakayathu gharighariniye, Loi kaerova i bapitaiso Une Boboma na ra tabo na ririwo regha, na Nyao Bobomako iyako i mena na i yaku taulaghike ghinda weinda.

¹⁴ Kaiwae riwandake ma mbe regha enge, ko nginauye lemoyo. ¹⁵ Thonngo ghegha inja, “Kaiwae ghino ma nimanima ngoreiye, iya kaiwae ghino ma ririwo nginauye regha.” Othembe i utu na ngoreiyako, ko emunjoru iye riwandake nginauye regha. ¹⁶ Na thonngo yanawanda inja, “Kaiwae ghino ma maramara ngoreiye, iya kaiwae ghino ma ririwo nginauye regha.” Othembe i utu na ngoreiyako, emunjoru iye riwandake nginauye regha. ¹⁷ Thonngo riwandake laghiye mbema maramara enge, ngoronga ne inja enge na i lonweya? Thonngo riwandake laghiye mbema yanawanda enge, ngoronga ne inja enge na inae? ¹⁸ Ko iyemaenge Loi vama i bigiraweya riwandake nginauye regha na regha ngoreiya le renuwanjako. ¹⁹ Thonngo riwandake nginauye wolaghiye vambema nginau regha enge, riwandake mbala nandere. ²⁰ Emunjoru riwandake

nginauye nginau wolaghiye, ko riwandake mbe regha enge.

²¹ Iya kaiwae maramara mane i dage weya nimanima na ija, “Ma nuwanguiyange. Ghino valikaiwangu.” Tembe ngoreiyeva, ma valikaiwae umbalinda i dage weya ghegha na ija, “Ma nuwanguiyange. Ghino valikaiwangu.” ²² Ma ngoreiyako, kaiwae riwandake nginauye iya ra renuwana na ranava thiye ma bigi regha, thiye bigibigi laghiye e riwandake. ²³ Tembe ngoreiyeva, riwandake nginauye iya ra renuwana monjimonjinae ra vaghavathana wagiyaawe, na riwandake nginauye iya monjinandangi ra njimbukiki wagiyaawe. ²⁴ Iya kaiwae riwandake nginauye thiye ma e ghanjitarawa, Loi mbowo i wovorovoronganiva. Loi va i vakatha riwandake ngoreiyako, ²⁵ na mbala thava riwandake nginauye tomethi lenji yaku, ko mbe thi venjimbunjimukikingi enge vara. ²⁶ Mbala the nginau i viri, nginauko wolaghiye thi viri. Na thongo nginau regha ghatarawa, nginauko wolaghiye ghanjitarawa.

²⁷ Ghemi Krais riwae, na regha na regha ghemi riwae nginauye regha. ²⁸ Ekelesiya e tine Loi kaerova i bigirawengiya nginau regha na regha tomethi ghabebe. I viva i bigirawengiya gharighari vavana na ghalinae gharaghambi, theghewoniye vavana thi tabo ghalinae gharautu na thi vathivathiya ghalinae, theghetoniye vavana thi tabo ravavaghare, vavana thi vakavakathangiya vakatha ghamba rotaele, na amba vavana ghanjibebe thi

vamorungiya ghambweghambwera; vavana thi thalavungiya gharighari, vavana thiye ekelesiya gharandevivangi, na vavana thi utu e ghalighaliṅa mbe regha. ²⁹ Ngoronga, taulaghiko ghalinae gharaghambingi? Taulaghiko ghalinae gharautungi? Taulaghiko ravavagharengi? Ngoronga taulaghiko valikaiwanji vakatha ghamba rotaele i ghanagha gharavakavakathangi? ³⁰ Ngoronga, taulaghiko ghanjibebe thi vamorungiya ghambweghambwera? Taulaghiko thi utuutu e ghalighaliṅa mbe regha? Ngoronga taulaghiko valikaiwanji thi viva ghalighaliṅa ma thi ghareghare na gharumwaru i rangi? ³¹ Ko iyemaenge nuwanguiya hu rovurigheghe na hu wo Nyao Boboma le giya ghanjirerenuwana laghilaghiye.

Gharethovu utuniye

E mbanake iyake nuwanguiya ya vagharenga kamwathi thovuye moli regha na iyake i kivwalangiya renuwanake wolaghiye.

13

¹ Othembe ne ya gungiya ghalighaliṅa tomethi na nyao thovuthovuye ghalinangi, ko thonḡo ma ya gharethovu, ghino ḡgoranḡwa umbwa i goi na laiye laghiye, o bigi i ravwaravwa thi ḡge na laiye. ² Othembe thonḡo wo bebe Loi i giya na ya utuḡa ghalinae, othembe thonḡo ya ghareghareya le renuwanḡa thuweleko, o thonḡo ya gharegharengiya bigibigike wolaghiye, othembe thonḡo lo lonweghathi i laghiye na

valikaiwanḡu yaḡa na ou i roiteta ghambae, ko othembe valikaiwanḡu na ya vakatha bigibigiko thiyako, thonḡo ma ya gharethovu, ghino lolo bwagabwaga moli. ³ Na tembe ḡgoreiyeva, othembe thonḡo ya giyavao lo bigibigike wolaghiye wenḡiya mbinyembinyenḡu, othembe thonḡo ya vatomweya riwanḡuke na vowo vavanava kaiwanji, ko thonḡo ma ya gharethovu, mane ya ndevaidi mun ghathovuye.

⁴ Thonḡo ra gharethovu, ra ghatanaghathi na ra gharemwaewo ghandane kaiwanji. Thonḡo gharethovu na weinda, ma ra yamwanja wenḡiya ghandane, ma ra wovorovoronjainda, ma ra sirari, ⁵ ela yavwatata, ma ghandamberegha kaiwanda ra rerenuwana, ma ra maya e gaithi, na ghandane lenji vakatha vathari weinda ma ra renuwajakiki. ⁶ Thonḡo gharethovu ina e gharenda, mbanja ghandau regha i vakatha thari, nuwanda i tharija, na mbanja ghandau regha i vakatha thovuye, ra wararija. ⁷ Thonḡo gharethovu ina e gharenda, mbanja ghandau i vakatha vathari weinda kaero ra ghatanaghathi, mbanjake wolaghiye ra vareminje ghandau, mbanjake wolaghiye ra gharematuwa ghandau ghathanavu tene i thovuyeva, na mbanjake wolaghiye ra ghatanaghathi.

⁸ Gharethovu thanavuniye ma ele ghambako. Ko bebengike thiyake: ra utunja Loi ghalinae, ra utuutu e ghalighaliḡa vavanava, o ra utuutu weiye la ghareghare; thiyake mane thi roghabana, nevole thiko. ⁹ Kaiwae Loi ma i woranḡiya bigibigike wolaghiye e

ghinda, na ma valikaiwanda ra ghareghare bigibigike wolaghiye ngoreiye i ghareghare, mbe seiwo enge, na Loi ghalinae ghautuutu tembe ngoreiyeva, ¹⁰ ko mbanja nevole Loi i vamboromborona bigibigike wolaghiye nevole e mbanako iyako, the bigiya vambe seiwo enge nevole iko. ¹¹ Mbanja va ngama ghino, ya vana gamagai, na lo vakatha na lo renuwana mbe ngama thanavuniye vara. E mbanake iyake kaero ya thaghamala, na ngama thanavuniye kaero iko e ghino. Na ghemi, tembe ngoreiyeva. ¹² E mbanake iyake ra ghimara vavaghawe bigibigi. Ghanji thuwathuwa ngoreiya ra thuweya ngalingaliyanda e kanukanu na ra ghimara vavaghawe, ko ne e mbanako iyako amba ra thuwengi ya bigibigi na ghanjithuwathuwa ne ngoreiya weinda lolo regha namoghamwanda na ra vethuweinda. E mbanake iyake lo ghareghare ma mboromboro, ko nevole e mbanako iyako amba ya ghareghare wagiya, ngoreiya Loi kaero i ghareghare wagiya wengo. ¹³ Ngoreiyake. Bigibigi laghilaghiye thegheto mbene thi yaku, lonweghathi, gharematuwa na gharethovu, ko theghetoko iyako e tinenji, gharethovu i laghiye kivwalaŋgi.

14

Nyao Boboma le bebe vavanava utuninji

¹ Mbala nuwamina nuwaiya lemi gharethovu gharighari kaiwanji na iye i kivwala bigibigike wolaghiye. Na tembe ngoreiyeva valikaiwae nuwamiya Nyao Boboma le giya kaiwami. Na

le giya e tine nuwamiya moli hu utuṅa to-toko i menawe Loi ghalinae. ²⁻³ Kaiwae thiye thi utuṅa totoko i menawe Loi thi utu-utu ghalighalina iya gharighari thi ghareghare, na iyake ghanjimwaewo. Ko iyemaenḡe iye i utuṅa ghalighalina mbe regha, ma i utuutuwe gharighari, ko iyemaenḡe i utu-utuwe Loi. Ma lolo regha i ghareghare le utuutu, i utuutu simosimo righe Nyao Boboma le vurigheghe e tine. Ko iye-
maenḡe thavala thi utuṅa toto i menawe Loi ghalinae, iyake i vavurigheghenḡangi, i dage vavurigheghenḡangi, na i vagharemalili gharighari gharenji. ⁴ Thela i utuutu e ghalighalina mbe regha, mbe i vavurigheghena enḡe ghamberegha le lonweghathi, ko thela i utuṅa Loi ghalinae, i thalavugha ekelesiya. ⁵ Nuwanḡuiya taulaghina ghemi hu utu e ghalighalina mbe tomethi, ko iyemaenḡe nuwanḡuiya moli valikaiwami taulaghina ghemi hu utuṅa Loi ghalinae. Kaiwae the lolo thonḡo i utuṅa Loi ghalinae, iye le thalavu i laghiye, i kivwala thela i utuutu e ghalighalina mbe regha le thalavu, thonḡo mbe lolo regha vara i viva ghalighalinako iyako mbala valikaiwae i thalavugha ekelesiya.

⁶ Lo bodaboda, thonḡo ya ghaona e ghemi na ya utuutu e ghalighalina mbe regha, ḡorongḡa ghathovuyako e ghemi? Nandere moli. Ghaghadi bigi regha enḡe Loi i woranḡiya e ghino na ya utuṅa e ghemi, o ghaghadi ya vagharenḡa bigi regha, o ghaghadi ya utuṅa Loi ghalinae, o ya vavaghare e ghemi,

ee e kamwathingike thiyake valikaiwami hu vaidiya ghamithalavuwe. ⁷ Wo hu renuwana ghemwadimwadiwongi ngoreiya gita na igo ghalinjanji kaiwae. Thongo ramwadimwadiwo regha ma i mwadiwona wagi yawe ma valikaiwae ra ghareghare the wothu i mwadiwona. ⁸ Tembe ngoreiyeva, thongo gaithi gharandeviva i wi vathara mema, ma lolo regha ne i vivatha gaithi kaiwae. ⁹ Iyake i mboromboro e ghemi. Ngoronga ne lolo regha ina na i wo le ghareghare thovuye, thongo lemi utuna ma i manjamanjalawe? Lemi utuna ngoreiya ndewendewema. ¹⁰ Ghalighalina tomethi e yambaneke laghiye, iyemaenge mbe e ghanjirumwaru enge. ¹¹ Ko thongo ghalighalinako iyako ma i rumwaru e ghino, loloko iya i utuutuko e ghino wo yamoyamo ngoreiya lolo i mena yaranji, na amalaghiniye ghayamoyamo e ghino ngoreiya ya mena yaranji. ¹² Iyake emunjoru e ghemi thongo kaero hu utuutu e ghalighalina mbe regha. Ghemi nuwamiya moli hu wo Nyao Boboma le giya, iya kaiwae mbala hu vakaiwona giya iya valikaiwae i thalavugha ekelesiya.

¹³ Iya kaiwae, thela i utuutu e ghalighalina mbe regha, mbala i nanjo weya Loi na valikaiwae i viva ghalighalinako iyako. ¹⁴ Thongo ya nanjo weya Loi mbe e ghalighalina regha, unenguke i nanjo, ko lo utuko gharumwaru ma ya ghareghare na lo renuwana ma ina weya iyako. ¹⁵ Ne ya vakatha enge budakai? Ne ya nanjo e unengu, na tembe ngoreiyeva ya nanjo

weiye lo renuwaṅa. Ne ya wothu tarawa e unengu, na tembe ngoreiyeva ya wothu tarawa weiye lo renuwaṅa. ¹⁶ Ko thonḡo unena e tine na u tarawe Loi, mbaṅa ghanuna i loṅwe iyake iya nuwaena i unouno ma valikaiwae ne iṅa weṅgughen, “Mbwana. Ngoreiye,” kaiwae ma i wo len utuna gharumwaru. ¹⁷ Len dage mwaewona weya Loi iye bigi i thovuye, ko iyemaenḡe ma i vavurigheḡenḡangi thiyē thi loṅwenḡe.

¹⁸ Ya vata ago weya Loi, kaiwae ya kivwalanḡa e ghalighaliṅa mbe regha ghanjiutuutu. ¹⁹ Ko iyemaenḡe ekelesiya e lenji mevathavatha tine, nuwanḡuiya utu mbe e ghanjirumwaru vara ya ḡunḡi, othembe thonḡo mbe vuvulima enḡe na ya vavaghare wenḡi wouneko. Ma nuwanḡuiya utu ten tausan gheviye ya ḡunḡi e ghalighaliṅa mbe regha.

²⁰ Lo bodaboda, thava lemi renuwaṅa ngoreiya ḡgama renuwanḡaniye. Gamagai nanasiye lenji ghareghare thari ele valivanḡa ma i laghiye iya kaiwae ghemi mbala hu reṅawe iyako. Ko e lemi renuwanḡana ḡgoramiya gharighari kaero thi thamatuwa. ²¹ Buk Boboma e tine, va thi rorinjona,

Ne ya utu wenḡiya gharigharike thiyake gharighari e ghalighaliṅanḡi tomethi na tembe ngoreiyeva bobwari e ghalinḡanḡi, ko othembe ne ya vakatha ngoreiyako, mane thi wovatha lo utuutuke.

²² Thonḡo ra utuutu e ghalighaliṅa mbe regha, nono regha iyako, thavala ma thi loṅweghathi

kaiwanji. Ma nono regha ralonwelonweghathi kaiwanji. Ko iyemaenge thonjo ra utuja Loi ghalinae, iyako emunjoru ralonwelonweghathi kaiwanji. Ma thiye, iya ma thi lonweghathi kaiwanji. ²³ Iya kaiwae, thonjo lemi mevathavatha e tine na ekelesiyana wolaghiye ghemi hu ututu mbe e ghalighalina regha, na thonjo ranumounouno vavana, o thonjo thiye ma thi lonweghathi thi ru na thi vaidinga, ne thi wovakabakabaleyananga. ²⁴⁻²⁵ Ko thonjo taulaghina ghemi hu utuja Loi ghalinae, na thonjo ranumounouno o thonjo lolo regha ma i lonweghathi i ru na i vaidinga, lemi utuna ne i vweya ghare, na le renuwana thuweleko i rangi e manjamanjala, na kaero ne i ghareghare iye thari gharavakatha, amba ne i numonjogha weya Loi, i dipoumu e thelauko vwatae, na i kururu weya Loi, na ina, "Emunjoru Loi ina e lemi wabwike iyake tine."

Kururu ghakamwathi thovuye

²⁶ Lo bodaboda, lo utuke gharumwaru ngoreiyake. Mbanja hu mevathavatha kururu kaiwae, lolo regha i wothuna wothu tarawa, regha i vavaghare, reghava i utuja budakaiya Loi le vatomwewe, regha i utu mbe e ghalighalina regha, na regha i viva gheuko le utu gharumwaru. Iyake ekelesiya yawaliye ghavatavatad kaiwae iya hu vakathanjiya wolaghiyeke thiyake. ²⁷ Thonjo gharighari vavana nuwanjiya thi utu e ghalighalina mbe regha, mbe theghewo enge o thegheto, mbema iyaengeko na thava te i vorova. Regha na regha

mbe ghambaŋa utu na thava thi utu na regha. Lolo reghava mbala i viva gharighariko lenji utu na i manjamanjala. ²⁸ Ko thongo ma ravavaghile regha ina ghenā, thela i utuutu e ghalighaliŋa reghava e lemi kururuna tine i rokubaro na mbe i utu enge vara weya ghamberegha na tembe ngoreiyeva weya Loi.

²⁹ Thavala Loi ghalinae gharautu, theghewo o thegheto thi utu, na ravandavandanako wolaghiye thi tuthiya lenji utuko. ³⁰ Thongo Nyao Boboma i woranjiya utuutu reghava weya lolo regha e mevathavathako tine, thela i utuutu e mbanako iyako, wo i rokubaro na i giya reghava ghambaŋa i utu, ³¹ kaiwae valikaiwae ghemi regha na regha tomethi mbe ghamimbaŋa hu utuŋa Loi ghalinae, na mbala taulaghina ghemi hu wo ghareghare na ghamidage vavurigheghe. ³² Gharighari thi vaidiya Nyao Boboma le giya na thi utuŋa Loi ghalinae, mbe thi mbaroŋa iya lenji utuko ghambaŋa, ³³ kaiwae Loi iye ma numounouno gha Loi, ko iyemaenge iye numomanjamanjala gha Loi.

Iyake thi yoyomara ngoreiyako ekelesiya wabwi e tine e ghembaghembake wolaghiye. ³⁴ Kururu ghamevathavatha e tine, wanakau thi rokubaro. Ma ghandathanavu ngoreiye na ra vatowwe wenjiya wanakau na thi utu, ko ngoreiya le mbaro ghautuutu, thi yayaku lenji ghimoghimoru e lenji mbaro raberabe. ³⁵ Thongo nuwanjiya thi vaito bigi regha, wo thi njogha e lenji ngolo amba thi vaitonjiya lenji

ghimoghimoru, kaiwae i monjimonjina thongo wevo i utu kururu ghambanja e tine.

³⁶ Ngoronga! Hu rerenuwana enge Loi le utu ghemi va hu utunakai vara? Hu rerenuwana enge mbe ghemi enge va hu lonweya utuniye? Nandere! ³⁷ Thongo lolo regha ina iye Loi ghalinae gharautu, o ina Nyao Boboma le giya i riyevanjara, valikaiwae ina, "Emunjoru, renuwanaako iya Pol i rori na i utunako, Loi iye le mbaro." ³⁸ Ko thongo loloko iyako i botewo renuwanaako iyako, ghemi tembe ngoreiyeva, hu botewoyathu loloko iyako, na thava hu lonwe le utuko.

³⁹ Iya kaiwae, lo bodaboda, hu vatomwenga e giya iya hu utuna Loi ghalinaeko, nuwamiya moli na hu wo, ko iyemaenge thava hu dageteningiya gharighari nuwanjiya thi utu e ghalighalina reghava. ⁴⁰ Hu vakatha wagiaweya lemi kururuna kamwathiniye na thava ne i marakaraka.

15

Emunjoru Jisas kaero i thuweiruva

¹ Lo bodaboda, e mbanake iyake nuwanguiya ya vanuwoviringa totoko thovuye iyava ya vavagharenana wenga kaiwae. Totoko thovuye iyako va hu wovatha, na e mbanake iyake lemi lonweghathina i ndeghathiwe. ² Thongo hu lonweghathigha totoko thovuye iyava ya vavagharenako wenga na hu vikikighathi, ne i vamorunga. Ko thongo ma hu lonweghathimbele totoko iyako, lemi lonweghathi i tabona bigi bwagabwaga.

³ Totoko iyava ya woko na ya utuṅa e ghemi, gharerenuwana laghilaghiye ngoreiyake: Krais va i mare la thari kaiwae ngoreiya Buk Boboma le utu, ⁴ thi worawe e ghabubu, na mbanja theghetoniye e tine kaero i thuweiruva mare e tine ngoreiya Buk Boboma le utu, ⁵ na i yomara weya Pita na amba i yomara wenḡiva Theyaworo na Theghewo. ⁶ Iyako e ghereiye na mbema mbananiye enḡe e tine, i yomara wenḡiya gharaghambu lenji ghanaghanagha paeb hundred na e vwatae. Vavana kaerova thiya mare na lemoyo moli amba e laghalaghanji. ⁷ Iyako e ghereiye i yomara weya Jemes na tembe i yomara wenḡiva ghalinae gharaghambiko wolaghiye. ⁸ Muyai moli vara i yomara e ghino. Othembe ranama ghino va ngoronḡwa ngama regha le viri na ngamako iyako mava i viri e ghambanja moli.

⁹ Kaiwae ghino ghalinae gharaghambiko wolaghiye nasiyeninji moli. Ghino ma elo thovuye na valikaiwae gharighari thiṅa ghalinae gharaghamba ghino, kaiwae va ya giya vuyowo wenḡiya Loi le ekelesiya. ¹⁰ Ko iyemaenḡe Loi le mwaewo bwagabwaga e tine ya tabo na ghalinae gharaghambi. Le mwaewoko iyako e ghino e uneune, kaiwae ya rovurigheghe elo kaiwoke iyake i kivwalanḡiya ghalinae gharaghambiko wolaghiye. Ko iyake ma wombereghake lo vurigheghe e tine na ya vakatha kaiwoke iyake, Loi le mwaewo e tine i giya vurigheghe e ghino iya ya vakatha kaiwoke iyake. ¹¹ Iyake kaiwae ghino o thiye, taulaghike ghime wo vavagharena Jisas le mare na le thuweiruva mare e tine, na

totoko iyako iyava hu lonweghathina.

Ramaremare tembene thi thuweiruva

¹² Ghime lama vavaghare e tine wona, “Krais kaero i thuweiruva mare e tine,” ko ngonongaenge na ghemi vavana hunava ramaremare ma tene thi thuweiruva? ¹³ Thongo ramaremare ma valikaiwae thi thuweiruva, Jisas tembe ngoreiyeva mava i thuweiru mare e tine. ¹⁴ Thongo Krais mava te i thuweiru mare e tine, lama vavaghareke iye bigi bwagabwaga na lemi lonweghathina iye bigi bwagabwaga. ¹⁵ Na reghava, thongo ngoreiyako, ghime wo utuna kwan Loi kaiwae, kaiwae wo utu na wona, “Loi kaerova i vakatha Krais na tembe i thuweiruva mare e tine.” Wo utu ngoreiyako, ko thongo ramaremare ma thi thuweiruva mare e tine, Loi mava i vakatha Krais na tembe i thuweiruva mare e tine. ¹⁶ Kaiwae thongo Loi ma i vakathangiya ramaremare na thi thuweiruva, Krais tembe ngoreiyeva ma i thuweiruva mare e tine. ¹⁷ Na thongo Loi mava i vakatha Krais na i thuweiruva mare e tine, lemi lonweghathina ma valikaiwae i thalavunga mun. Mbe hu yakuyaku vara e lemi thari tine. ¹⁸ Mbala tembe gharerenuwana ngoreiyevake, thavala va thi lonweghathigha Krais na kaero thiya mare, thiya marevaowe moli. ¹⁹ Thongo la lonweghathi weya Krais mbe ra vaidi enge vara e mbanake iyake na mbanu muyai ma tene i thalavuindava, gharighari lenji ghareviri kaiwanda valikaiwae i kivwala lenji ghareviri gharighariko wolaghiye kaiwanji.

²⁰ Ko mbema emunjoru Loi kaerova i vakatha Krai na i thuweiruva mare e tine, na kaiwae i viva na i thuweiruva mare e tine, iye i vugha thuweiru wenjiya ramaremareke wolaghiye. ²¹ Ghimoru regha le vakatha kaiwae, gharigharike wolaghiye thi vaidiya mare, na tembe ngoreiyeva ghimoru mbe reghava le vakatha kaiwae ramaremare tembe e lenji thuweiruva. ²² Kaiwae weya Adam gharigharike wolaghiye thiya mare, na tembe ngoreiyeva, weya Krai gharigharike wolaghiye valikaiwanji thi vaidiya yawalinji memeghabananiye. ²³ Ko iyemaenge thuweiruva tomethi mbe ghanjimba: iviva Krai va i vugha thuweiru, amba muyai thavala amalaghiniye le gharighari mba ne i njoghama. ²⁴ Na ne e mbanako iyako mba le ghambako ne i mena. Amba Krai i mukuwongiya rambarombaro wolaghiye, ghamba mbaro wolaghiye, na vurighegheke wolaghiye na i valawe ghamba mbaro weya Ramae Loi. ²⁵ Krai tene i kivwalangiya vurighegheke wolaghiye, kaiwae Loi kaerova i renuwanavao na ija Krai ne i mbaro ghaghada ne i biginjonaongiya ghatighiyako wolaghiye e gheghe raberabe. ²⁶ Thighiya momouniye na ne i mukuwo moli mare. ²⁷ Buk Boboma ija, “Loi kaerova i bigiraweya bigibigike wolaghiye Krai e gheghe raberabe.” Buk ija, “bigibigi wolaghiye” Krai ne i mbaronangi, ko ma ngoreiyeva Krai ne i mbarona Loi, kaiwae Loi iye i woraweya Krai na i mbaronangiya bigibigike wolaghiye. ²⁸ Ko mba Krai ne

i mbaronangiya bigibigike wolaghiye, iye Loi Nariye, mbene iye vara ghamberegha i bigirawe e nima e Ramae ele ghamba mbaro raberabe na mbe Loi vara iye ghamberegha rambarombaro laghiye na i mevoru moli.

²⁹ Thongo ramaremare ma tene thi thuweiruva, ngoronga ghathovuyako wenjiya thiye thi bapitaiso ramaremare kaiwanji? Buda kaiwae na thi bapitaiso ngoreiyako? ³⁰ Na thongo ramaremare ma tene thi thuweiruva, buda kaiwae na ghime mbanake wolaghiye wo bigiraweime e viri, thari na mare e tinenji toto thovuye kaiwae? ³¹ Lo bodaboda, ya dage emunjoru, weya Krai Jisas ghanda Giya, ghemi lo ghamba sirari. Na ngoreiyake i emunjoru, ya dage emunjorua e ghemi, mban regha na regha mbe weingu vara mare. ³² Gharighari vavana mbe inanji gheke, Epesas tine, ghanjithanavu ngoreiya thetheghan tagaithi na thi wowogaithi e ghino. Ko thongo mbe ya wowogaithi enge yambaneke renuwananiye kaiwae, ngoronga ghathovuyako e ghino? Thongo ramaremare ma tene thi thuweiruva, “mbema ra ghanjangaenge na ra munumu, kaiwae evole raya mare.” ³³ Thava hu lonweghathi kwanikwan, “kaiwae vighathi raithari i vakowana thanavu thovuye.” ³⁴ Wo lemi renuwanana i rumwaru na wo hu viyathu thari thanavuniye. Ghemi vavana Loi ghaghareghare i ghenethavwi e ghemi. Ya utu ngoreiyako na i vakatha monjina e ghemi.

Thuweiruva yamoyamoniye utuniye

³⁵ Ko lolo regha ne i vaito, ne iña, “Ne ŋgoronja na ramaremare tembe thi thuweiru na e yawayawalinjiva? Mene thi wova the ririwo?” ³⁶ Unouna ghen! Mbaña ne u wokabu bigi regha weiwa, iviva mbowo ne i mare enje ko amba muyai i mbuthu na e yawayawaliye. ³⁷ Bigiko u wokabuko u wokabu mbouye, ŋgoreiya raña kon o bigi reghava mbouye, mane ririwoko iya ra wokabuko iya i mbuthu. ³⁸ Ghinda ra kabu mbouye, ko Loi i wogiya ghaririwo ŋgoreiya le renuwaña. Weiwo mbouye regha na regha thi mbuthu na ghamberegha e ghaririwo. ³⁹ Bigibigi e yawayawalinji e yambaneke tomethi mbunimaninji ghayamoyamo. Mbunimaninjiko ma i mboromboro. Gharighari mbunimaninji mbe regha, thetheghan mbe regha, ma mbe regha na borogi mbe regha. ⁴⁰ Bigibigi e yambaneke mbe e riwariwanji na riwanjiko mbe e ghavwenyevwenye, ko bigibigiko iya inanjiko e buruburu riwanji mbe regha na riwanjiko ghavwenyevwenye mbe regha na i tomethi wenjiya bigibigi inanji e yambaneke. ⁴¹ Ngoreiya varae ghayamoyamo ghavwenyevwenye mbe regha, manjala ghayamoyamo ghavwenyevwenye mbe regha, na ghitarra ghanjiyamoyamo ghavwenyevwenye mbe regha. Na othembe ghitarra ghanjiyamoyamo ghavwenyevwenye mbe thi tomethiva.

⁴² Iyake nevole ŋgoreiyako, mbaña ramaremare ne thi thuweiru na tembe e yawayawalinjiva. Mbaña ra beku ririwo ma

meghabana biginiye, ko mbaṅa Loi ne iṅana i thuweiruva iye meghabana biginiye. ⁴³ Mbaṅa ra beku ririwo ma e ghayavwatata, ko mbaṅa Loi i vaṅguthuweiruva, ririwoko i vwenyevwenye. Mbaṅa ra beku ririwo njavonjavovoniye, ko mbaṅa Loi i vaṅguthuweiruva, ririwo vurivurighegheniye. ⁴⁴ Mbaṅa ra beku, yambaneke ririwoniye, ko mbaṅa Loi i vaṅguthuweiruva, iye buruburu ririwoniye.

Thongo yambaneke ririwoniye inawe, tembe ṅgoreiyeva buruburu ririwoniye mbe inaweva. ⁴⁵ Buk Boboma iṅa, “Loi va i vakatha għimoru iviva idae Adam na i giya yawaliye.” Ko iyemaenḡe Adam muyai moli i tabona nyao iya i giya yawali. ⁴⁶ Ko Loi mava i giyakaiya buruburu ririwoniye weya Adam. Va i giyakai enḡe yambaneke ririwoniye, amba muyai i giya buruburu ririwoniye. ⁴⁷ Adam iviva, Loi va i wo yambaneke thelauniye na i vakathawe, ko Adam muyai moli i mena e buruburu. ⁴⁸ Yambaneke għarighariniye riwanji ṅgoreiya għimoruko iyava i vwara e yambaneke riwae. Na għarighari thiya yaku e buruburu riwanji ṅgoreiya għimoruko iya i menako e buruburu riwae. ⁴⁹ E mbaṅake iyake għinda ṅgoranda għimoruko iyava i vakatha yambane thelauriye, iyake ṅgoreiya għinda nevole ṅgoranda għimoruko iyava i menako e buruburu.

⁵⁰ Lo bodaboda, lo utuke għarumwaru ṅgoreiyake: mbunima na madibe ririwoniye, ma valikaiwae ne ve ru Loi ele għamba mbaro tine, na ririwoko iya mane i meghabanako

ma valikaiwae ne ve ru e ghembako iya i meghabanako tine.

⁵¹ Wo hu vandene! Wo ya woranjiya simosimo regha e ghemi. Ghinda ralonwelonweghathi mane taulaghike ghinda raya mare, ko iyemaenge taulaghike ghinda nevole Loi i giya ririwo togha weinda. ⁵² Iyake Loi ne i vakatha, mbe mbanara enge vara, ne ngoreiya ra ririyavuniya marandama, na mbanja ne thi wiya memako muyaiko moli vara iye ghambanja. Mbanja mema ne i wa, ramaremare thi rakathuweiru na mane te thi mareva na ghinda iya amba ma raya mareko, Loi ne i giya ririwo togha weinda. ⁵³ Kaiwae ririwoke iya ma i meghabanake wone i vivi na ririwo memeghabananiye, na ririwoke iya e mbanjake valikaiwae i mare, wone i vivi na ririwoko iya ma valikaiwae i mare. ⁵⁴ Na mbanja thongo i viva riwandake na ririwo memeghabananiye, na ririwoko iya ma valikaiwae i mareko, ne i vaemunjoruna Buk Boboma le utu, iya injako, “Loi kaero i mukuwo vara mare.”

⁵⁵ “Mare, iyava unjake na u kivwalaime?

Mare len vurigheghe ghaminae iyanganiye?”

⁵⁶ Mare le vurigheghe ghaminae i mena thari thanavuniye e tine, na thari thanavuniye i mena mbanja ra kivwala Loi le mbaro. ⁵⁷ Ko ra vata ago weya Loi, kaiwae ra tubwewe ghanda Giya Jisas Krai, ghinda thari thanavuniye na mare ra vurigheghe kivwalangi.

⁵⁸ Iya kaiwae, lo bodaboda na valigharegharengu, wo hu ghatanaghati na

hu ndeghathi weimi lemi vurigheghe. Mbanake wolaghiye weiye lemi gharevatomwe wo hu kakaiwo Giya le kaiwo, kaiwae hu ghareghare lemi kakaiwo Giya kaiwae mane i tabona bigi bwagabwaga.

16

Mwaewo ghamban utuniye

¹ E mbanake iyake nuwanjuiya ya vaman-jamanjalana e ghemi, va lemi vaito e ghino mani ghamban kaiwae, Loi le gharighari inanji Jerusalem kaiwanji. Hu vakatha ngoreiya va ya dage wenjiya ekelesiya Galeisiya ele valivanja na thi vakatha. ² Sande regha na regha ghemi regha na regha i bigiraweya mani vavana na mbe ghawabwi. Thela modae i laghiye i bigiraweya laghiye, thela modae nasiye seiwo i bigirawe. Maniko iyako hu bigirawe vakatha, na mbala mbanja ya ghaona, ma te ra rerenuwajava mani ghamban kaiwae. ³ Hu tuthingiya ghimoghimoru vavana maniko iyako gharamban, na mbanja ne ya vutha e ghemi, amba ya roriya randeviva Jerusalem lenji letangi na ya giya yanawanji ghimoghimoruko thiyako kaiwanji. Ko amba weinji letako iyako ya varyengi na thi yombana lemi mwaewona Jerusalem. ⁴ Thongo ne i thalavunji, amba weinguyangi wo raka gheko.

Pol le kaiwo longalonga utuniye

⁵ Mbowo ne ya wakai Masedoniya ele valivanja. Iyako ne e ghereiye amba ya ghaona e ghemi. ⁶ Mbwatane seiwo mbanja molao ya

yaku weinguyangiya ghemi, o weinguyangiya ghemi ghaghada ndewendewe ghambaṅa ne iko; ko amba ne hu thalavungo na maya wava e thevalivanga reghava. ⁷ Ma nuwanguiya mbema ya lathuwenga enge na kaero ya itetengava. Ko iyemaenge nuwanguiya mbowo ya yaku weinguyangiya ghemi mbaṅa seiwo molao, thongo Loi le renuwana ngoreiye. ⁸ Ko iyake mbowo ya yaku gheke, Epesas e tine ghaghad Pentikos gha Thaga ghambaṅa. ⁹ Othembe wothighiya lemoyo inanzi gheke, mbowo ya yaku, kaiwae kaiwo ghathinimba kaero i mavu moli e ghino.

¹⁰ Thongo Timoti i ghaona e ghemi, hu kulavatha na iye ngoreiya ghemi regha na thava weiye le mararu, kaiwae i vakavakatha Giya le kaiwo ngoreiya ghino. ¹¹ Tha lolo regha i ghimara njonanjoṅa, ko iyemaenge hu variyenjogha na weiye le gharemalili e ghino. Ghino mbe iyake ya roroghaghawe weiyangiya la bodaboda vavana.

¹² Ghaghanda Apolos utuniye, ya giya vavurigheghe laghiyewe na ya munjeva weiyangiya la bodaboda vavana thi ghaona thi thuwenga. Ko iyemaenge ma i warariṅa mbanake iyake i ghaona. Tene mbaṅa thovuye regha i warariṅa amba i ghaona.

¹³ Hu njimbukikiṅga, hu ndeghathi vurigheghe e lemi lonweghathina, hu gharematuwa na hu vurigheghe. ¹⁴ Hu vakathangiya bigibigike wolaghiye weiye lemi gharethovu.

15 Kaero hu ghareghareya Setepano weiyangiya le wabwi, thiye va i viva moli thi tabo ralonwelonweghathi e lemi valivanzana iyana, Akaiya e tine, na thiye thi vatomwenji na thi kakaiwo Loi le gharighari kaiwanji. Lo bodaboda, ya giya vavurigheghe e ghemi 16 na hu yayaku gharighari ngoranjiyako lenji mbaro e raberabe, na tembe ngoreiyeva gharigharike wolaghiye thavala thi rovurigheghe lenji kaiwo Giya kaiwae. 17 Ya warari laghiye Setepano, Potunetas na Akaikas lenji mena kaiwae. Kaiwae hu mebwagabwaga moli e ghino, thiye thi methinga na thi mena thi thuwengo. 18 Thiye thi vavurigheghejango na ghemi tembe ngoreiyeva thi vavurigheghejanga. Gharighari ngoranjiyako valikaiwae hu yavwatata wanangi.

Dage mwaewo

19 Ekelesiya Eisiya ele valivanza thi mwaewo e ghemi. Akwila na levo Prisila, weinjijangiya ekelesiya thiye thi memevathavatha e lenji ngolo, Giya e idae, thi mwaewo laghiye e ghemi. 20 Na tembe ngoreiyeva labodabodake wolaghiye e valivanzake iyake thi mwaewo e ghemi.

Hu tagavamomoya nimami wenjiya ghamune na hu vemwaewo wenga, kaiwae ghemi Loi le gharighari.

21 Wombereghake e nimanju ya roriya utuu-tuke thiyake: "Ghino Pol ya mwaewo e ghemi."

22 Thela thonjo ma i gharethovu weya ghanda Giya, nuwanjiya Loi i gurawe! Giya, u mena!

²³ Giya Jisas le mwaewo i yaku e ghemi.

²⁴ Lo gharethovu i yaku e ghemi weya Krais
Jisas.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 22 Feb 2024 from source files dated 31 Aug 2023

7a63d67b-b890-5db0-8880-b6fd64f3b62f